

II.  
JOANNIS BAPTISTÆ  
MOLINARI TRIDENTINI

DE

APOPLEXIA  
SPECIMEN



*Excudebat Vindobonæ*

ANNO à R. S. CIO IO CCLIII.

---

THOMAS TRATTNER.

*Rationalem quidem puto medicinam esse  
debere : Instrui vero ab evidentibus  
causis, obscuris omnibus, non a cogi-  
tatione artificis, sed ab ipsa arte re-  
jectis . . . . Verumque est ad ipsam  
curandi rationem nihil plus conferre,  
quam experientiam. Cels. lib. I. I.  
præf.*



Graviora, quæ irrepererunt, menda, ita antequam legas, corrigo.

### Præfatione.

*Pagella V. articuli 20. linea 3. loco vetat lege negat.*

#### Parte prima.

<i>Numeri</i>	28.	<i>linea</i>	5.	<i>loco</i>	potentiæ lege obstantiæ
	36.		3.		subitania subitaria
	43.		2.		Hydatitibus Hydatidibus
	71.		1.		disrumpatur disrumpantur
	98.		2.		flamascensem flamescentem
	133.		2.		Simptomata Symptomata

#### Parte secunda.

<i>Numeri</i>	2.	<i>linea</i>	4.	<i>loco</i>	prænoscete lege	prænoscere
	78.		2.		Celfus	Cœlius
	80.		2.		indicarat	indicaret
	98.		1.		femoribus	femoribus
	101.		3.		tracto	facto
	111.		4.		diarrhæam	diarrheam
	139.		4.		cruote	cruore
	143.		1.		inierdum	interdum
	168.		9.	a morbo	solidorum	morbo solidorum
	171		2.		olim pulvis	olim cum pulvis
	eod.		4.		aut pilulæ	tum pilulæ
	203.		2.		eum	cum

Cetera, quæ leviora sunt, aut ad interpunctionem pertinent, intelligentis Lectoris erit emendare.

Hippocratis verba ex Fœsiana interpretatione desumimus, quam, Freindio probante, aliis omnibus anteponimus.



# PRÆFATIO.



*Uæ ratione suscipiuntur , si inanis gloriolæ, non publicæ utilitatis causa suscipiuntur , bono cive , opinor , indigna sunt. Eapropter , cum ego nec ingenio nec doctrina ita polleam , ut vel novi quid in artem medicam afferrem , vel quæ ab aliis dicta sunt , illustrarem , abstinui hætenus consulto a scribendo ; ne rempublicam insulsa garrulitate ( odi enim loquaces ) fatigarem. In quo proposito usque ad vitæ exitum permansissem , nisi inopinato legibus in scientiarum artiumque commodum nuper sancitis , esset mihi obtemperandum.*

*Cum primum itaque novi impositam mihi scribendi necessitatem , cogitavi , num qua possem discentes in medicina faciunda , in quo summa est artis difficultas , juvare.*

*Animadverti siquidem sæpenumero, tirones aliqui ingeniosos, & in artis fundamentis perscrutandis baud segnes, cum ad lectulos sese transferunt, paratam quidem habere amplissimam vocum supellectilem ad spectaculum peropportunam, ad morbos vero discernendos, ægrosque levandos ineptissimam.*

*Huic rei, quoniam artem, Rempublicamque pessumdat (nam hoc pacto circulatorum numerus augefcit) afferri medelam posse saltem in parte judicabam, si eodem tempore, quo singulæ partes, functionesque humani corporis describuntur, subjungerentur quasi in tabella aliqua conjunctim designatæ eadem partes, functionesque, prout morbis cuicumque peculiaribus afficiuntur: ita ut admissus, & veluti manu ductus ad eas contemplandas tiro effingat sibi notiones corporis cum sani tum morbofi dilucidas, distinctas, nec facile evanescentes.*

*Hoc pacto quilibet vel tardior singula medicinæ membra, quæ dispersim, ut in scholis solet, perceperit, valeret in corpus quoddam utibile redigere: quod nec omnibus, nec nisi post longam exercitationem concessum est.*

*Cum itaque satis longo artis apud varias gentes in Valetudinariis; & in populosis regionibus usu, id assecutum me esse arbitrer, ut mediocriter saltem distinguam, quid utile, quid non in arte contineatur, sperabam me rem nec infructuosam, nec ingratham discipulis facturum, si quid tale auderem.*

*Propterea cepi in chartam conjicere, quæ ad noscendos, servandos, restituendos humani corporis motus, sensusque pertinere existimabam: Nam de universa medicina si voluisssem agere, homo essem omnium confidentissimus.*

*Caro-*

*Carotidum itaque vertebraliumque ductum sequutus decreveram conformationem cerebri, tegumenta, usum exponere: ut deinceps de ortu, distributione, munere nervorum; de eos permeante, nutriente, roborante liquore illo, quem spiritum appellant: De universis tandem, quæ nobilissima isthæc sensus, motionisque instrumenta cum lædere tum juvare valent, ordine differerem.*

*Reor quippe ( ut suum cuique est iudicium ) ad ingerendas in aliorum animos de quibusque rebus notiones, nil naturæ consentaneum magis, ac methodus illa, quam scholæ Resolutoriam vocant, & optimam esse ajunt ad inveniendum.*

*Ea siquidem id, quod primo in sensus incurrit, ponit ante oculos designatum notis certis ac dilucidis, persequiturque ita, ut ab ea notione, circa quam versari velimus, deerrare nequeamus: Quemadmodum baud raro accidit in compositoria, quæ subtiliter abstrahendo subtrahit oculis rei exemplar, efficitque, ut alio nec volentes divertamus.*

*Nec intelligere cum acutissimo \* Condillaco \*\* valeo, quæ de causa via, quæ mihi profuit ad rei alicujus ignotæ investigationem, obsit, cum alios ad ejusdem rei sibi pariter ignotæ comprehensionem velim perducere.*

*At cuique placent sua: Quid mihi placeat, expono: Nec is sum, qui velim compellere alios, ut probent, quod ego probo.*

*Hiscæ meditationibus dum impertio id temporis, quod a medicina assidue faciunda supererat, sentio instare diem ad scriptionem*

( 3

\* Encycloped. Præf.

\*\* Essais sur l'orig des conoiss. hum. Part. II. sect. II. cap. 4. §. 51. pag. 287. tom. 1.



nem vulgandam præscriptum, quem protendere nefas. Quoniam ergo operi, in quo de vitæ incolumitate, suavitatque agitur otii, quod satis est (nam ingenio sum infœcundo, morosoque) impendere non potui, argumento hoc in opportunius tempus seposito, statui modo apoplexiæ tantum signa, causas, proprietates, curationem pertractare: Ut exhibeam saltem specimen aliquod methodi, quam utpote in morbis describendis commodiorem mente concepi.

Sistit enim in parte priori coram legente signa, e quibus illico pateat, quid res sit, quam tractamus: Vestigat deinde effectuum causas: refert, quid dissectiones cadaverum manifestarunt: tum solidarum, fluidarumque partium vitia: inde quæ corpora præ ceteris morbo huic subsint: quæque eum excitent causæ: qui denique ab aliis sibi cognatis morbis differat.

In altera vero exprimuntur variæ ejus species, cujuscumque initium, progressio, exitus, tam cum naturæ leges agunt suoapte ingenio, quam cum a medicina inturbantur. Ex quo cum judicatio, tum curatio desumitur, uniuscujusque temperaturæ, ætati, sexui accommodata. Monita subinde interfero, baud mediocriter, nisi me fallit animus, conducibilia.

Id vero persequor per summa capita. Etenim probe scio abesse opellam hanc quam longissime ab ea perfectione, quam materiæ gravitas, atasque mea postulerent. Debuissem enim antequam de apoplexia verba facerem, pandere minutatim sensus, motusque naturam. Singulæ deinde apoplexiæ causæ confirmandæ fuissent accuratis, multiplicibusque observationibus. Medicamentorum denique effectus exponendi baud quidem ratiunculis, plerumque vanis insicetisque, sed repetitis nec fallentibus experimentis.

Hinc



*Hinc mirum non erit, si plura leviter, aliqua extra ordinem, nonnulla perturbate attulerim. Nam ut de aliis taceam, non ea solum, quæ de motu sensuque, sed & ea, quæ de corde, sanguine, temperamentis perspicuitatis causa alieno in loco dissero, tractationem ipsam melius præcessissent.*

*Si quid igitur pretii habitura sit disputatio isthæc, id unum erit, quod delineet ordinem, quo quæque in certas classes distribuantur, prout sibi succedunt: ita ut possit quilibet memoria rem totam impermixtam comprehendere, & ad arbitrium recollere. Quin habeat designatus veluti stationes, in quas aphorismorum in morem, quos Baglivius \* merito in usum revocatos vellet, locet quacumque legendo, meditando, observando adnotaverit.*

*Vitari cum prolixitatem, quam plures studiose quærunt, ut habeantur docti; tum brevitatem, ne videar expetere enarrationes longas, ut docentibus aptas, ita legentibus ob repetitas pluries easdem sententias, perturbatumque ordinem, molestissimas.*

*Diçtione usus sum nec artificiosa, nec sublimi, sed simplici, qualem decet Hippocratis, Celsique imitatore. Ornari enim res ipsa vetat contenta doceri. \*\* Nec nobis aliud studendum, nisi ut morbos cognoscamus: nam qui suffecerit ad cognoscendum, ut Præceptor \*\*\* ait, sufficit ad sanandum: morbi autem non eloquentia, sed remediis sanantur \*\*\*\*. Hinc latinitatis non fui eo sollicitus, ut refugerim voces formulasque eas, quas Latio quamvis ignotas Natio medicorum civita-*

\* Prax. med. lib. I. cap. 9.

\*\* Manil. astronomicon. lib. III. v. 39.

\*\*\* De arte num. 20.

\*\*\*\* Cels. libr. I. Præf.

*vitae donavit. Quas ille, qui se ait scribere, ut populi valetudini prospiciat, si respuerit, vel ipsius Ciceronis \* Manilique iudicio \*\* condemnabitur.*

*Quandocumque Hippocraticas sententias adducimus, sequimur quidem compendii causa vulgatam consuetudinem; attamen haud nos latet, Hippocratem non omnium, quae ipsi tribuuntur, esse parentem.*

*Hæc habui, quæ præmittam, ut doctorum virorum iustas reprehensiones præoccupem: Quod nempe ego natus in eo solo, quod Germaniæ, Italiæque, illustrium doctrinæ domiciliis civitate fruitur; quodque aluit Mathiolas, genuit cum Alexandrinos gravissimo Thuani \*\*\* elogio immortales, tum Guarinonios, Melchiorios, Michelotos Viros Medicinæ scientia, libris editis, honoribusque clarissimos disputationem emissem tumultuariam, inelaboratamque.*

*Non deerit certe occasio, qua ostendam voluntatem æmulandi Cives istos meos a me non abesse.*

*Quomodocumque autem se res habeat, profiteor me id unum propositum habere, ut per celebri Medicorum hujus urbis Collegio observantiam meam testatam faciam: Quorum animadversioni opellam hanc, qualiscumque sit, subjectam volo.*

\* De finib. lib. III. sub init.

\*\* Astronomic. lib. III. v. 40.

\*\*\* Hist. libr. XCIX. anno 1590. tom. IV. pag. 898. edit. London.



DE  
**A P O P L E X I A**  
**P A R S P R I M A**  
**S E C T I O I.**



Edicinam artem scilicet longam, periculique plenam facturum decet cumprimis morborum species prænosse : inde enim pendent iudicium, & curatio. Morbos patefaciunt signa. Ex horum ergo recensione auspicandum.

2 Nos propterea ad Hippocratis exemplar, quod in scientia naturali pertractanda magno Verulamio duce philosophi præstantiores in usum revocarunt, definiemus apoplexiam ita, ut vel primo obtutu, quid hac voce significemus, internoſcatur.

**A**

**Mor-**

3 Morbus ergo, qui eos, in quos sive præsensensus, sive nec opinabilis irruit, vel enecat illico; vel cordis motu, pulsibus arteriarum plus minus turbatis, respirationeque difficili, varia, stertentisque plerumque simili superstitibus, sensibilitate prorsus, æque ac motione illa, quam voluntariam vocant; ejus vero, quæ a partium dispositione cum pendeat, appellari potest machinalis, exiguo interdum relicto vestigio privat; ita ut æger veluti alto somno occupatus artubus prolapsis, ore interdum hiante spumanteque: oculis modo apertis, & languentibus, & non raro convulsis; modo clausis, facie modo ad aliquot tempus colorata & turgenti, modo illico pallente, subsidenteque, calore modo superflite, modo prorsus evanescente, repente sternatur, Græcis *apoplexia*, Celso *nervorum resolutio*, & ut vulgo creditur, *morbus attonitus*, Latinis sequioribus *fideratio*, Germanis *percussio* appellatur.

4 Genus morbi teterrimum, qui mortales quibus vitam indulget, ita plerumque pessumdat, ut videatur optabilius periisse, quam illi ad spiritum misere trahendum superfuisset.

5 E signis, quæ morbi effectus sunt, in causas inquirendum est. Insigniores, quæ hic apparent, turbæ sunt, sensibilitatis, motionisque extinctio, pulsibus, respirationeque haud sublati. De his itaque loquemur primo.

6 Qui philosophandi libidine ad scribendum proritantur, phænomenorum omnium rationes introspicere putant facillimum. Nos contra, quibus ante oculos obversatur illud Celsi (1); *Quæ causa vel secundam valetudinem præsent, vel morbos excitent, quomodo spiritus, aut cibus vel deferatur, vel digeratur, ne sapientia quidem Professores scientia comprehendunt, sed conjectura profectantur*, istud pro dignitate præstare difficillimum arbitramur.

(1) Præf. lib. I.

7 Plura sane, ut notum cuilibet est, prostant de arte universa, præclare hercle, excogitata systemata : At in quibus, nisi velimus sponte cæcutire, plus opinioni, quam veritati datum esse intelligimus (2). Natura enim vel in minimis rebus tam varia est, tam late patens, tantis tenebris obvoluta, sensus nostri, tam hebetes, tam infirmi, mens denique tam angustis limitibus circumscripta, ut negatum mortalibus videatur non dicam corporis humani machinam, sed nec exiguum arenulæ granum penitus comprehendere. Hinc periculum est, ne ab eo labore, unde gloriam exspectamus, prudentium virorum reprehensionem reportemus. (3)

8 Pauca igitur de hoc argumento, quæ verisimiliora putabimus, proferemus : relicta cūcumque aliter sentiendi libertate. Abhorremus enim quam longissime ab illorum stolidi impudentia, qui vel inepte despiciunt, vel satis pro imperio damnant id, quod tenebroso eorum cerebro fors non illeverit. Nam hæc Celso iudice (4) ut utilia artificii sunt, parum tamen ad artem. At ea, quæ potis sunt conferre ad averruncandum morbum, quod artis est, diligentius ac fufius versabimus. Genus enim humanum a nobis expetit non quidem verba, sed facta.

9 Et ut a motus sensusque extinctione exordiamur : Humani corporis bene valentis nervos ita esse comparatos, ut mentem tactionum, quas ipsi patiuntur, quasi admoneant : eique vicissim eos tendere, laxare, restituere volenti, corde excepto, quod suapte natura, mente vel reluctante movetur, obsecundentur, nemo sui compos in dubium revocat.

10 Quæ ratione id peragatur : Incorporeane illa Divini oris aura corpus tangat, ab eoque tangatur : Ab ipsone summo

A 2

Nu-

(2) Anatom. D'Heister avec des Essais de physique: preface ed. 1735. 8vo.

(3) Hist. naturel, & descript. du cabinet du Roy tom. 2. pag. 515. ed. in 4to.

(4) Præf. lib. 1.

Numine per vices, ex eo, quod corpori aliquid accadat, edoceatur: An ita conformata sit, ut vi sua perceptiones in se excitet ex æquo respondentes motibus, quos corpus sibi conjunctum editurum est, quoniam a philosophis magni nominis ingeniose in utramque partem disputatur, non est meum definire.

11 Consentiunt tamen fere omnes in hoc: Mirabilem istum concentum mentem inter & corpus lege a supremo rerum arbitro sancita tunc adesse, quandocumque humores libere omnia corporis vasa circumeant; ut liquori, quem a mobili partium exilitate spiritum vocant, liceat pervadere nervos, eisque motus elastici augmentum, tremulam vim, sensibilitatemque impartiri.

12 Ex hoc enim fit, ut nervi rerum extrapositarum impressiones excipiant, easque ad sensibilitatis, ut loqui amant, sive emporium, sive commune sensorium, qualecumque illud sit, propagent. Hinc ideæ excitantur in mente, quas hæc utpote natura cogitans distinguit, confert inter se, & prout ipsi libuerit, judicat, deliberat, agitque.

13 Quotiescumque igitur spirituum e cerebro ad sensus, motusque voluntarii organa fluxio suspenditur, fibrillæ nervæ vibrandi vi despoliantur, rerumque exteriorum impressiones vel non excipiunt, vel si exceperint, protrahere ad emporium non valent. Quamobrem statim ac motus hiccæ nervorum tremulus perit, continuo mens sentiendi, percipiendi, judicandi, corporique, ut ita dicam, imperitandi facultate destituitur.

14 Quantum vero attinet ad explicandum, quare in tanta corporis perturbatione pulsus & respiratio perseverent, intricatum vestigatu est.

Utrum-

15 Utrumque sane pendet a corde. Vulgatum est cordis motum pendere unice a spiritibus, qui e cerebello ad ipsum transmittuntur, ita ut statim acisti inhibeantur, illud e vestigio subsidat. Quapropter qui hoc pro comperto habent, ajunt, ideo pulsus ac respirationem manere, quia cerebellum compressum non est: Nam a cerebelli compressione, ut pronunciant, illico mors.

16 At nescio utrum clientela ista, qua vita cordis in cerebelli potestate sit, pateat tam manifesto, ut de ea dubitare non liceat. Observationes certe & experimenta illam si minus evertunt, saltem infirmant. (5)

17 Quid ergo dicendum? Fateor me in hac ambiguitate non ausurum proloqui, nisi auspicato, & in Tentaminibus physicis ad anatomiam Heisteri jure a sagaci naturæ interprete Buffonio (6) commendatis, & in præstantissimo de Structura cordis opere, nobile Galliæ ornamentum Senacius (7) mentem suam referasset.

18 Liceat autem hic mihi Italò, & Malpighianæ Lancisianæque disciplinæ alumno publice profiteri, me viro incomparabili debere plurimum; cum quod ex ejus scriptis haud mediocriter profecerim, tum quod ipse omni laudum genere dignissimus de præceptoribus meis, deque Itala in universum gente haud abjecte, ut rabiosuli quidam at edentuli catelli, sed magnifice, ut docti ingenuique cum suæ (8) tum aliarum gentium (9) homines solent, senserit, scripseritque: (10)

A 3

Scio

- (5) Memoir. de l'acad. Roy. des sciences 1716. p. 435. ed. Amstel. : Hist. de l'acad. 1702. p. 39. 1703. p. 33. & p. 69. 1711. p. 33.
- (6) Hist. natur. & descript du cabinet du Roy. tom. 2. pag. 115. ed in 4.
- (7) Encyclopedie par diderot, & alembert, artic. anatomic.
- (8) Encyclopedie discours prelim. pag. XXL.
- (9) Boerhav. orat. de studio Hippocratico; & or. de usu ratioc. mechan. in Medic.
- (10) Senac traite de la struct. du cœur. tom. I. p. 144. & 147.



19 Scio me obscuri nominis hominem esse : At ingenuus mi est animus : officio itaque debito deesse non possum. Spero autem illum pro humanitate sua hoc meæ erga eum observantiæ , gratique animi testimonium haud dedignaturum.

20 Ejus itaque ductu auspiciisque ita ratiocinandum arbitramur.

21 Certum est cor esse muscolum. Musculi contrahuntur non quidem vi propriæ texturæ , sed & altera cum interiori , quæ eos reddat contractiles , tum exteriori , qua contractilitas ista exeratur.

22 Textura propria, quatenus fibra est constans e terra oleoque eam compingente, contractilis natura non est. Opus ergo habet aliqua re contractili , quæ in ejus interstitia se inferens agat in eam alternatim , illamque reddat contractilem. Musculi, qui voluntati consentiunt tunc agunt , cum a spiritibus e cerebro per nervos transmissis impelluntur. Quibus deficientibus musculi flaccescunt.

23 Id igitur, quod musculis contractilitatem tribuit est id quod appellatur spiritus. Spirituum omnium officina videntur esse eæ partes , unde nervi originem ducunt : quod generatim est cerebrum : & fortasse illius defectu spinalis medula : nam de cerebello, ut diximus, haud constat.

24 Quo magis musculi fabrica intricata est , eo diutius valet spiritus in illam fluentes retinere. Cor à musculis reliquis differt structura, propterea quod fibras habet varii generis & valde implexas inter se. Cor itaque præ aliis musculis aptius est ad retinendos spiritus.

23 Non habet ergo opus perpetuo eorum fluxu , ut contractilis sit, quemadmodum ceteri, qui statim ac fluxio spirituum sub-

subsistit, flaccescunt. Etiam si igitur fluxio ista subliterit, cor non privatur contractilitate statim, ideoque potens est contrahi etiam postquam e corpore extractum est.

24 Ut vero reapse contrahatur, indiget causa aliqua externa: musculi enim status naturalis est, ut subsidat. Causa ista esse nequit calor, nam in homine extincto calor haud illico deperit, praesertim in corde, quod tamen minime movetur. Cardimelec, archæus, spiritus praesidens, anima regens commenta sunt.

25 Quoniam vero cor, aut punctum aut alia aliqua re irritatum movetur, manifestum est, omne id, quod illud irritare valet, posse illud movere. Hoc autem est sanguis, qui appulsu ad cordis parietes, efficit, ut illud contractilitate sua vicissim agens cum excipiat sanguinem, tum exprimat.

26 Quotiescumque igitur sanguis fluit, cor movebitur: ab eoque adigetur ille invicem ut fluere possit. Quod sequetur, quousque spiritus fluant ad cor, aut illi, qui intra fibras cordis sunt, non dissipentur, aut denique sanguinis fluxio non impediatur, nec retardetur.

27 Hinc pulsus erit validior, quo flaccescentes corporis partes premendo canales cursui sanguinis cordis vi superflite acti plus minus obstabunt. Cordis enim vis, licet nobis ad amissim haud explorata, tanta nihilominus est, quæ vires renixusque partium reliquarum corporis superare valet. Eapropter licet partes corporis reliquæ contractili spiritu destitutæ vasa pondere magno premant; circuitus tamen sanguinis, & cordis motus non ita facile subsistent. Quin & intercepta prorsus spirituum ad ipsum fluxione perdurare motus hicce ad plures horas potis est.

28 Eadem de causa cum pulmo & thoracis musculi flaccescant, fit, ut cor quatenus validiori vi pollet, valeat pulmone

motum aliquem inferre; iste vero nequeat sese expedire ea facilitate qua in statu sano solet, cum propter æquilibratam nullæ sibi validiores iusto vincendæ sunt potentia. Eapropter difficilis est respiratio, sensimque difficilior fit, quo magis partes flaccescendo obfunt cordis motui: ut & pulsibus accidit morte impendente durissimis.

30 Hinc aër violenter trusus è pulmone ronchos excitat, quod propter musculorum laryngis palatique laxamentum in exitu præpediatur. Unde quo morti propior est homo eo magis ronchi augentur.

31 Ex his igitur, quæ de morbi hujus effectibus commentati hætenus sumus, conjicimus apoplexiam, quæ corpora tota percellit (nam de ea tantum agimus) præsto esse, quando cumque secretio distributioque spirituum vel prorsus, vel in ea saltem parte, quæ ad sensum voluntariasque motiones necessaria est, suspendantur.

32 Conjecturæ tamen hæc funto. Nam licet spiritus reapse esse, nervosque permeare probabili ratiocinatione ex analogia corporis, & è quibusdam experimentis inferamus, inficiandum tamen non est, posse nos in hoc, haud secus, ac in eorum origine, natura, proprietatibus hallucinari.

33 Cerebri scilicet fabrica, quam primariam vitalium spirituum officinam vulgo existimamus, mortalibus oculis impervia est, ut Steno-Anatomicus Physicusque, vel ipsius summi Leibnitii iudicio (11) magnus, haud dubitaverit in oratione, quam tanto præceptore dignus auditor Winslowius (12) refert, palam affirmare, se & eos, qui ad suam usque ætatem de hoc viscere, in quo animus sedem locasse videtur, loquuti fuerant, summam ejus ignorance professos esse. Quod

(11) Essais de theodic. part. 1. n. 100.

(12) Winslowv. expos. anatom. tom. IV. p. 459. Paris. in 12mo.

ceteri, qui de eo hætenus differuerunt, vel aperte confirmarunt, (13) vel perplexo vagoque scribendi genere satis superque significarunt.

34 Ex hac tamen ignorationis professione, quam a sincero pectore veri amor depromit, haud sequitur, ut temere vulgus blaterat, medicinam esse præstigium quoddam fraudolose adinventum, quo incautis bene nummatis illudatur. Injuria Deo vox, dignaque hominibus ratione abutentibus. Impium enim est putare optimum misericordemque generis nostri conditorem tribuisse nobis corpus fragile caducumque, lævamen vero vel denegasse vel invidisse, ac si nos ad cruciatus, quibus ipse delectaretur, procreasset.

35 Utcumque igitur plurima nobis prudens subduxerit, concessit tamen id, sine quo vita esset prorsus infelix. Quod & prævisi & cogniti & depulsi a peritis artificibus morbi testantur.

## S E C T I O II.

PLIN.

36 PRætermisiss itaque sublimibus arcanarum rerum contemplationibus descendamus ad ea perlustranda, quæ in cadaveribus illorum, qui subitania morte corruerunt, indefatigabilis Anatomicorum industria detexit, ut deinde, quæ causæ apoplexiam excitent, quæque corpora præ ceteris videantur illi subiecta, quoad nobis licet, peruestigemus.

37 Historiæ, unde hauriemus ea, quæ exposituri sumus, debentur Bonetto (14) & Wepsero (15) accuratissimis morbosarum cerebri affectionum promicondis.

B

Vel

(13) Senac. L. III. Cap. 3. tom. 2. p. 74.

(14) Sepulchr. anatom.

(15) De morbis capit.

38 Vellemus autem licere nobis hic loci proprietates historiamque cujusque humoris in hoc morbo repræsentare. Quoniam vero viri isti dexterrimi nequiverunt in fluidas partes inquirere ea diligentia, quam certe adhibuissent, si sanguinem pluribus constare partibus natura inter se prorsus diversis suspicati essent, utemur vocibus, quibus ipsi usi sunt, donec quid dilucidius ab experientia sive nostra, sive aliorum doceamur: de humoribus nostris paulo inferius eloquemur.

### 39 In cerebro ergo

I. Vel nihil apparuit, ut cum in quibusdam fœminis, & infantibus, qui e convulsionibus, tum in aliquibus, qui ex valida cerebri concussionem perierant.

II. Substantia tota aut in partem fuit inflammata.

III. Vasa erant ultra modum sanguine, serove turgentia.

IV. Substantia cerebri nimis flaccida, imo ex Garneri & Brasavola (16) pene consumpta.

V. Sanguis, lympa, serum, pus eruperat, vel quia exsudaverat, vel quia vasa diffregerat. Nam qui scripsit, quique probavit vasa corporis diffringi non posse, judicandus est ea ne per somnium inspexisse.

VI. Tegumenta aut nimis tenta erant, aut laxa, aut quo vitio corrupta.

VII. Aër intra cerebrum, & ejus membranas conclusus.

40 Quoniam vero hæc accidunt solidarum, fluidarumque partium vitio, utrasque perpendemus. Perspicuitatis autem gratia incipiemus a solidis progressuri deinde ad fluidas.

41 Vi-

(16) Lazorne de morb. capit.

41 Vitiis, quæ subinde in earum quaque singillatim animadvertemus, adjiciemus rationes, propter quas autumamus cerebri munia ex iis turbari: Sed paucissimis conceptas verbis, ne fortasse medicinam rem simplicem, verecundamque observationes tantum, & experimenta desiderantem, vocibus significatione nudatis infuscentes, videamur voluisse doctrinæ famam garriendo, sophistarum more aucupari. Non enim voluminum, quæ scombris piperique cucullos præbitura olim sunt, moles, sed propriarum virium diffidentia medicum a sycophanta discriminat.

42 Ac I. Cerebrum ipsum introspeciamus. Peccare itaque potest.

I. Textura, si enim fibræ, quibus illud constat, molles vel firmæ plus justo sint: si figura ejus aliqua in parte, ut in monstris, manca sit, humor vel non permeabit, vel lente fluens restagnabit, aut cordis validiori vi pulsus vasa disrumpet.

43 II. Adnatis: Tumoribus nempe, abscessibus, scirrhis in meditullio, medullaque oblongata: Hydatitibus, varicibus, aneurismatibus, concretionibus sinuum.

44 III. Extrinsecus advenientibus.

I. Vulnere, quod tamen sit altum. Constat enim corticalem substantiam læsam, & ad ovi columbini magnitudinem extractam sine apoplexia: Quin & ægros hosce convalescere prorsus, ut præter aliorum testimonia observavi ipsemet in homine, qui mihi se commiserat.

45 II. Concussione valida, quæ vascula vel resolvit, vel discindit, vel e naturali statu deturbat, ut fluidarum partium liber cursus aliquo temporis spatio turbetur, & for-

tasse vasa ad sanguinem ultro pellendum inepta, cordis pulsibus non remittentibus repleantur, tendanturque ad aliquod tempus, quousque iterum quavis de causa contractilitatis vim recuperent.

45 Accidit enim mihi, ut ad juvenem trigessimum ætatis annum agentem casu ab alto apoplecticum advocarer. Ecchymosis supra sinistram bregmatis os haud procul a futura sagittali fecit, ut calvariam vel desidem, vel fissam suspicarer. Tumorem ergo ut aperirem, ad calvariam detegendam arteriolas, in quibusdam calvariis e binis foraminibus haud procul ab eadem futura prodeuntes, quas vitare nequibam, incidi. Sanguinem copiosum filis carptis repressi, ad sequentem diem periositii separatione, terebrationeque, siquidem opus esset, dilata. Ast noctu jugi sanguinis e vulnere eruptione vasa interiora contractilitatem recuperarunt, ita, ut sequenti die ægrum ore, indusioque sanguineo-fœdatum stupens invenerim sanum, & cum congerrone suo suaviter colloquentem. Vulnus facili opera coaluit.

46 Hæc in cerebro ipso.

Duræ matri vero accidunt.

I. Crassities præter naturam sive a feminio, sive a morbo.

47 II. Falx messoria in cartilaginis morem obdurata, quo actio ejus retardatur, vel cessat.

48 III. Concretiones polypos imitantes, calculive intra ejus sinus, præcipue longitudinales, a quibus refluxus sanguinis prohibetur.

49 IV. Pus disrupto abscessu effusus vel sanguis, qui eam comprimendo idem præstant perpetuo, quod notæ apud



apud Gallos foeminae, cui calvariae pars deerat, narratur accidisse ad breve momentum quandoque.

50 V. Vasa illius sanguine farta: Hydatites, calvariae fractae particula scabra: Uteri, hypochondriorumque nervi irritati, quibus omnibus illa convellitur, distrahiturque.

51 Calvariam modo, quae cerebri concameratio est, rimemur.

I. Si ossa male conformata sunt, futurae vel osseae vel deletae, si exostoses, morbida Venus intulerit, impeditur sanguinis circuitus, halituumque perspiratio, unde aucta humorum mole aequilibras abrumptur.

52 II. Ossa fracta, fissa, depressa duram matrem premunt, tendunt, laxant, lacerant. Quod praestat & sanguis per eorum rimas vasis externis diffractis interior permeans.

53 Nunc de aliis corporis partibus, ex quibus cerebro noxa aliqua importatur, dicendum est.

54 Itaque si fiant cartilaginosa, aut osseae, vel carotides, vel magnae arteriae curvatura, quam osseam ante 30 annos in octogenario Polono Romae in splendido valetudinario, cui a Sancto Spiritu nomen est, observavi; vel demum quaecumque solidae partes, quibus id vitium advenierit, cum liquidas agere nequeant, sanguinis circuitus sistetur.

55 Si jugulares venae comprimantur, sanguis redundabit in cerebro, itagnabitque propterea quod durae matris sinus, qui per eas deplentur, carebunt spatio ad sanguinem jugiter advenientem excipiendum.

56 Si vasa arteriosa in pectore aut abdomine ex aneurisma-

te vel vulnere disrumpantur, sanguis effluet in cavitates, unde non refluet ad cor, quod sanguinis appulsu cessante sistetur, & cum eo circulatio tota deperibit, unde mors. Quam eadem de causa infert tumor ingens arteriam deprimens; sanguis intra pericardium, serum denique in pulmones ex repentino pectoris hydropse, quo amicus meus haud multo ante sublatuſ est, effuſum.

57 Pari modo a convulsionibus coarctata vasa sanguinem ad cerebrum adigent, quo tenuissimi illius canales comprimuntur, aut a naturali ſtatu dimoventur.

58 Cor item mole auſtum, paralyticum, vermibus eroſum; vel ſupra diaphragma prolapſum, quale præter illud, quod ſummuſ Lanciſiuſ memorat (17) mihi peritiſſimuſ Lanciſii profeſſor Cajetanuſ Petrioluſ in homine, qui in valetudinario Romano ad D. Johanniſ Lateranenſiſ deceſſerat, oſtendit. Ex eo enim preſſum diaphragma ſtomachuſ urget, quo ſanguis ex arteria magna ad ſuperiora tranſfertur. Lapideſ pariter in ciſtiſellea, aſpera arteria compreſſa, bronchiave obſtruſta, ſimiliaque ſolidarum partium vitia, quæ vel præfocare, ſanguinemque vel adigere, vel derivare potis ſunt, quæ recenſere minutim non eſſet poſſibile.

58 Accedamus modo ad fluidaſ parteſ. Juvabit autem in anteceſſum de humorum noſtrorum natura aliquantiſper præfari. Etenim qui artem tractarunt, haud ita dilucide de iis diſſeruerunt, ut quid & in illiſ reapiſſe contineatur, & quid quoque ſub nomine intelligendum ſit, pateat aperte. Quod vitio illiſ verti non poteſt, opinor: Occupati enim in artiſ ambitu univerſo perluſtrando oculoſ ad ſingula demittere nequiverunt. Quapropter ut ambiguitaſ omniſ, qua nihil boniſ artibuſ detrimentoſiſ, a ſcriptiſ noſtriſ, quoad

(17) De ſubit. mort. obſerv. I. II. obſerv. II.

quoad possumus, exulet, mutuabimur a Senacio (18), quæ ipse obstinato labore experiundo, observandoque in sanguine deprehendit. Præsertim cum videamus illi in plerisque consentire Hallerum (19), cujus singularis in anatomicis, & naturalibus rebus peritia *Museo continet* lepore bonis omnibus, quotquot in Europa litteras colunt consentientibus, Germaniam nostram ornat, illustratque.

59 Tria itaque sese nobis offerunt in sanguine cum primum fusus dissolvitur sponte. Oleum rubellum, oleum albidum, aqua luteola.

60 Quod rubet, particulis constat exilibus, satis tamen conspicuis, flammam concipientibus, numero prout corpora sunt, inæqualibus, forma non quidem globosa, ut Læwenhœkio homini certe acuto visum; sed fortasse lenticulari propioribus.

61 Hæ particulæ, quas cæteroquin firmas, putredo tamen maxime deterit, absumitque, non commiscuntur inter se, sed quoniam cohæsionis vi haud exigua pollent, compinguntur simul, quo fit, ut coagmentatione fortuita (nam iterum separabiles sunt) massas conficiant multiformis figuræ, rubore quaquaversum humorem omnem pervadente, nitentes.

62 Hinc quo valentiora sunt vasa, præsertim capillaria, quæ eas attritu majori compingant, sanguis haud tantum in pulmonibus, sed ubicumque illa fuerint, est coloratio.

63. Per eas, quas compendii causa *crueris* nomine insigniemus, sanguis viget, aptusque est dare membris robur, vivacitatemque. Hisce contra debilitate, otio, morbo de-

(18) *Struët. du cœur.* l. 3. c. 4. p. 74. tom. 2. & *supplém.* cap. 3. p. 654. ejusd. tom. 2.

(19) *Primæ linæ physiolog.* cap. 7. p. 93. ed. 2. 1751.

perditis, imminutisve, languent, torpent, squallent, frigent omnia.

64. Albido sub humore, qui haud uniusmodi est, ut plurimi viri boni putarunt, & post eos insulsi quidam scribittarii, meliora nec edocendi, mordicus tenuerunt, latent.

I. Oleum quoddam copiosum cruore levius, putredine pariter destructile, haud flammescens, quaecumque pervadens; natura tamen cum intra, tum extra vasa haud raro sponte, frequentius motione nimia, morbis, ebullitione, in contractilia filamenta insolubilia, corio interdum duriora cohaerescens: *Lympham* vocabimus.

65 Ipsa efficit cum ut sanguinis partes natura difformes, æquabiliter dispersitæ contineantur, ne diffuant; tum fortasse, ut vasa cruori impervia roborentur.

66 II. Materies quædam sale imbuta, acescens, difficile putrescens: natura, etiam cum coacta est, fluxilis: universi corporis nutritioni dicata (vulgo *gelatinam* vocant) nobis vero propterea, quod in carniū coctione humor hic est id, quod jus appellamus; istudque aquæ leviter insidet, lubet illum vocare *rosam*.

67 III. Oleum quoddam salibus carens, copiosæ terræ mixtum, calore, aëre durefcens: nec flammescens: nec putrescens: quin humores reliquos a putredine servans: intestina, trachæam, bronchia, nasum liniens, quod dicitur *mucui*.

68 Quod omnia isthæc vehit, oleum aquæ intimius mixtum, facile volatile: haud flammescens: cum igne, tum acidarum quarundam partium commixtione spissescens ita, ut quam ubertim continet aquam, nunquam prorsus dimittat:

tat : difficulter putrescens : nec minimum acefcens : frigore licet percitum, fluens, concreta solvens, *serum* appellabimus.

69 *Massa* hæc, quæ ad putredinem sponte vergit cum salibus præfertim acidis, licet oleo terræque intimius insertis, ut sese difficulter extricent, tum aëre majorem partem haud elastico foeta : quam alimenta diætîm suppeditant : vasa multiplicia consequenter elaborant : natura haud fluida ; ita ut causis, quæ illam agunt, pellunt, immutant, cessantibus, immota maneat ; & plus minusve cum intra tum extra vasa coaguletur, *sanguis* appellatur.

70 Fluentes itaque partes peccant :

I. Vel defectu, vel copia.

Deficiunt I. Si arteriæ a tumore ingenti, aut quocunque alio modo comprimantur, ut in canibus, qui revinctis carotidibus torpent.

71 II. Si disrumpatur.

III. Si materia aliqua concreta obstruantur.

72 Ex his enim non tantum cordi materies, per quam illud moveatur ; sed etiam cerebro id, quod opus est ad spirituum secretionem, subtrahitur.

73 Abundant I. Si vasa ultra modum a sanguine distenta carent repulsu, quod *plethoram ad vasa* vocant medici.

II. Si cor e languore sanguini pellendo impar obruitur, quod dicitur *plethora ad vires*. Ex alterutro enim machinæ universæ motus retardatur, humores consistunt, & utramque cerebri substantiam comprimunt.

C

74 II.

74 II. Qualitate. Nam vel sunt : I. Crassescences, & minus fluxiles, quæ lentè progressæ tenues mollis hujusce visceris anfractus farciunt.

75 II. Compactæ : Si sanguis densior est, ita ut vasa cerebri inferciat, vel e corde ad caput non advehatur : Quod apoplexiæ genus a vasorum interceptione Hippocrates (20) appellavit, cui similis est illa, quam Carolus Piso (21) referendam putat ad cerebri sphacelum Hippocrati (22) memoratum.

76 III. Solutæ : Cum enim humores, qui probe inter se haud commixti sunt, fluitent, fere aquei ; si quavis de causa velocius ad cerebrum pelluntur, aut transudant, aut in grumulos concreverunt. Quod vidi in quinquagenaria vidua leucophlegmatica, quæ me advocaverat. Cum enim post repentinum subdelirium apoplectica obiisset, dissecta conspicuos præbuit ventriculos, anteriores albido humore refertos.

IV. Acres, quas scorbuticas, alkalinas, aromaticas, oleosas placuit quibusdam appellare ; (\*) fortasse, ut mirabilibus istis vocibus arti splendorem conciliantes a vetulis, ignavisve hominibus curationes minima opera pollicentibus prudenter secernerentur.

77 Eæ enim humores dissolvunt, pungentique salitudine spasmos inducunt, a quibus illorum cursus interceptus, & repentina corruptio ; ut in disputatione de gangræna, quam paramus, luculenter ostendemus.

78 V. Motu plus justo celeri vel lento. Celer enim vasa

(20) De rat. vict. in morb. acut.

(21) De colluv. serof. p. 104.

(22) De morb. lib. 2. & 3.

(\*) Vid. Boërhav. orat. de usu ratiocinii mechan. in Medic.

*vasa dilatat, tendit & acore juncto diffringit. Retardatus efficit, ut humores consistent, stagent, obstipent.*

79 Hæc sunt, quibus spirituum secretio, distributioque, quatenus observatum est, impediuntur.

80 Animadvertendum tamen est, omnes istas causas, vel singillatim, vel conjunctim, solere quidem subito hominem insensilem, immobilemque reddere, quin & interimere. At non ideo casus omnes repentinos apoplexiæ adscribemus, quod ab imperito vulgo, & interdum a quibusdam minus cautis medicis, cum artis nostræ dedecore, factum vidimus.

81 Nam turbamenta, quæ inanitio fuscitaverit, tribuenda sunt cordis vel circulationis læsioni: quæ vero e convolutionibus, irritamentisve aliunde ac in cerebro natis advehuntur partium peculiarium, unde ortum trahunt, vitio deputabimus. Quod indicat solennis illa distributio in apoplexiam *idiopathicam, & sympathicam.*

82 Apoplexiæ enim nomine peculiariter appellanda sunt vitia illa, quæ cerebrum tantum primario afficiunt ita, ut ex istius visceris læsione reliquum corpus intervertatur. Quod ideo monuimus, ne in curatione ab effectuum similitudine decepti adhibeamus ea, quæ adhibuisse poeniteat.

83 Quam tamen cerebri partem apoplexia obsadat, caliginosa nocte premit Deus. Nam si, ut antea diximus, in cerebro eorum, qui apoplectici occubuere, nulla interdum immutatio oculis manifesta inventa est: si restagnatio, eruptiove humorum observatur etiam in iis, qui paralyssi tantum laborarunt; si eruptio haud raro apoplexiæ effectus est, non causa: si denique cerebrum abscessu corruptum



fuit a palpebris usque ad medium (23), nec apoplexia, nec loquelæ impedimento subsecutis, quid certi colligere inde possumus non video.

84 Eapropter imbecillitatis meæ conscius definiendum isthoc relinquam illis, qui gloriæ sibi ducunt, si nec suspi-centur, naturam eam esse, quæ in plerisque ad artem re-spicientibus cogat medicum, ut nisi ineptire velit, obmu-tescat.

85 Neque ideo labores, quos præstantes superioris & nostræ ætatis medici in cadaveribus incidendis suscepere, inutilitatis arguemus: Quod factum est a veteribus empi-ricis, nuperisque circumforaneis, nescio quibus, mira de se, quæ tamen latent, prædicantibus, qui rudi popello fraudem facturi, ea quæ ipsi ignorant, impudenter irriden-do verbose traducunt.

86 Qui Pacuvium audiant volo: *Ego odi homines ignava opera, & philosopha sententia. Nihil enim (verba sunt Gellii) (24) fieri posse indignius atque intoleratius putabat, quam quod homi-nes ignavi, & desides operiti barba & pallio mores & emolumenta philo-sophiæ in lingua, verborumque artes converterent, & vitia facundissime saccusarent, intercutibus ipsi vitiis madentes.*

87 Quippe non ex tumultuaria miselli cujusvis scriptoris lectione: (\*) Non ex fortuita morbi, quem natura ipsa, sine medici ope, sanasset, curatione: Non ex præconcep-tis ad arbitrium opinionibus, confutisque male cohærenti-bus sententiis: Sed ex intenta, nec unquam intermissa hu-mani corporis cum viventis, tum vita desituti observatione eruuntur solida fundamenta, quibus prævertendorum, de-pellendorumque morborum ars, quantum homini concedi-tur,

(23) Horst. apud Malpigh. op. posth. p. 219. ed. 1700. in 4to.

(24) Lib. 13. cap. 8.

(\*) Vid. Boerhav. orat. de commendando studio Hippocr.

tur, inædificetur. Æque enim ridiculum esset existimare, posse quem horologii vitia emendare, cui horologia prorsus ignota sint: & non posse id præstare artificem, quod elementorum quibus singula horologii instrumenta conflata sunt qualitatem, proprietates, vim intimius non comprehenderit.

88 Verum infelices hosce simiolas ab iis, quibus id negotii a republica datum est, coercendos, prætereamus.

### SECTIO III.

89 **A** Poplexiæ igitur (quoniam ad alterum inquisitionis nostræ membrum devenimus) obnoxii quidem sunt omnes, qui spiritum ducunt. Nec sibi ita blandiri debet medicus, ut putet posse se certo pronunciare existetne, an existitum sit in quocumque corpore vitium aliquod ex iis, quæ paulo ante memoravimus. Hoc agyrtarum esto. Innumera enim sunt causæ, quibus id, quod neque per divinationem futurum existimabatur, emergit improvise: Quas si quis in numerato se habere jactitet, aut rationis est impos, aut aliorum credulitate nequiter abutitur: *Præterquam quod turpe esset illum, quem improvise moriturum pronuntiavimus, vel evasisse, vel lento morbo decessisse.* Quæ sunt insignis Lancisii in aureolo de subitanis mortibus opere (25) verba memoratu dignissima.

90 Quandoquidem vero experientia animadversum est, quosdam sive temperatura, sive genere vitæ, sive ætate, sexu, exterioribus tentatos hoc morbo præ aliis mortalibus esse; hinc nos de iis paulo accuratius sermonem instituemus, quantum ad eorum habitum internoscendum conferre existimamus.

91 Ac primo subsunt apoplexiæ quidam ex vitiato feminio : quo fit, ut morbus iste videatur interdum fere gentilis, aut familiaris. Quod tamen nec perpetuum, nec frequens est, nec medicorum oculis pervium.

92 II. Generatim corripuntur ii, quibus caput magnum, collum breve ( in quibusdam enim quinque vel sex tantum aderant colli vertebræ ) oculi rubentes, caligantesque, facies livens, vel præter modum rubicunda, corpus obesum.

93 Cum autem ea, quæ communia pluribus sunt, in disciplinæ commodam formam redigenda censeamus, exordiemur a temperaturis hominum, prout eæ a majoribus nostris dispersitæ sunt ; ut quid ominosi in earum qualibet portendatur, præsciscamus.

94 Verum antequam ulterius progrediamur, animadvertendum hic loci cum Hallero (26) ducimus, existimandum non esse, mortales singulos in quaque earum classe exacte contineri. Temperies enim, quæ ex solidarum, fluidarumque partium proportionem oritur, peculiaris cuique est, adeoque multiplex. Quoniam vero unamquamque describere, præsertim cum humores levi de causa vel momento immutentur, non esset possibile ; certæ quædam classes constitutæ sunt, in quas conjicerentur ii, qui plura e signis, quibus illæ constant, & inter se discernuntur, præseferunt : ut artis præceptionibus facilitas quædam compararetur.

95 Haud ergo plus tribuendum classibus istis, quam ab eorum structoribus tributum est. Medicina enim versari debet non circa hominem generatim, qui nullibi est, sed circa unumquemque. Quod probe memoria tenendum.

(26) Prim. lin. physiol. med. ed. 2. n. 169. p. 101.

96 Con-

96 Contemlemur primo eos, qui plethorici vulgo appellantur (27)

Ii nempe sunt, qui ventriculo, intestinis, mesenterio, diaphragmate, musculis abdominis, succisque digestoriis valentibus, ætate plerumque media, præditi, cibisque succosis nutriti, cruore scatent, corporeque pleno, molli, venusto, colorato, vasis actioni liquorum minus resistentibus, fibris nerveis moderate intensis, & ad motum excipiendum, blandeque propagandum promptis utuntur; ita ut animo hilari sint vivo, agili, omniumque quæ sensus delectant, curioso.

97 Eorum vasa ob otium, victumque copiosum, si nimis replentur, venæ circa collum turgent, artus aggravescunt, torpentque, exiguum motum fatigatio consequitur, respiratio fit identidem difficilis, arteriæ temporales vehementer pulsant, urina est crassa, rubraque, somnus altissimus, longus, incendiorum insomniis turbatus: Quod medici *plethoram* morbum vocant, apoplexiæ haud raro parentem.

98 II. Biliosos. Quo nomine haud intelligimus eos, qui assumtis pinguibus, oleosisque materiam flammascenscentem eructant, sed ii, quorum corpus gracile, agile, robustum est, oculi, genæ, labia rubent, venæ amplæ, cruore copiosiori confertæ, pili, ut plerumque in Italis Hispanisque, fusci crispique, pulsus magnus, celer, fibræ nerveæ firmæ, sensiles, ad citiores vibrationes promptæ, ingenium alacre, ad difficilia retrusaque tendens, ira præsens, audacia, confidentia, ambitio, rixarum somnia.

99 In utroque temperamento, si qua de causa ob nimiam fibrarum contractilitatem spiritus commoveantur, vel succi

(27) Vid. Verdriesium d æquilibr. ment. & corpor. p. 16.

succi jam acres acrescant magis, rarefiantque, vel denique sanctoriana perspiratio minuatur, funesta plenitudo facillime suborietur.

100 Scio fuisse olim & adhuc esse, qui novandi pruritu quodam stimulati ea, quæ de plenitudine ab Hippocrate, Celso, Galeno, ceterisque ad hæc nostra tempora egregiis medicis dicta sunt, risui habent, plenitudinem fieri prorsus non posse confidenter affirmantes. At bonos istos, si mente præjudiciis vacua, usuque subacta pollerent, puderet, credo, tantos viros stoliditatis insimulare: Ac si illi naturam, affectionesque humani corporis, quod ante oculos toto vitæ suæ tempore habuerunt, ignoraverint.

101 Verum de plenitudine in ea tractatione, quam ad umbilicum fere perductam de febre acuta, brevi, Deo volente, evulgaturi sumus, latius differemus.

102 III. Phlegmaticos, qui propter fibrarum cum infirmitatem tum minorem contractilitatem, sanguinemque fere aqueum glabri sunt, pallidi, versicolores, oculis palpebrisque tumentibus, labiis pallentibus, corpore laxo, pilis albicantibus, mollicellis, venis angustis, & latentibus, pulsu parvo, debili, nervis inertibus: Unde digestio lenta, urina aquea cruda, sopor, aquarum somnia, extremarum partium frigus: mens torpens, segnis, hebes, ocii amans, impatiens laboris, obliuiosa denique, meticulosa, anxia.

103 Cum itaque humores in hisce hominibus convenienti proportionem inter se nec distributi, nec ut decet uniti sint, discurrantque lentissime, concrefcunt in grumulos cerebro exitiales.

104 IV. Atrabiles sive melancholicos: Quorum fibræ infirmæ, sed irritabiles, humores vero aqua destituti, terra-

terraque prægnantes, compactiles; color faciei, corporisque ater, habitus exsuccus, macer, pili fusci, vasa lateralia angusta, abdomen pice velut infernum, digestio laboriosa, animus intentus, morosus, difficilis, propositi tenax, suspiciosus, querulus, acerbus.

105 Hos haud difficili negotio sternit apoplexia, si sanguis velocius intra cerebri vasa actus exsiccatur.

106 Eapropter quæcumque humores vel augere, vel spissare, vel agitare, vel solvere, vel atterere valent, conferunt plurimum ad ciendam in prædisposito corpore apoplexiam.

107 Hinc lautus victus, animi securitas, exercitationes corporis intermissæ, somnus plenus, coelum tenue, actuosæ fervente sole exercitationes, flammiferorum liquorum potus, Veneris æstrum furens, immodicæ maxime post epulas saltationes, febris æstuans, qua æger laborans Neapolis in Nosocomio, me præsentem, ictu oculi interiit, perspiratio repressa, iracundia, vel plenitudinem amplificant, vel cordis motum ita accelerant, ut sanguis fere ebulliens copia æquo majori ad superiores partes trusus, cerebrum tam in sanguineis, quam in biliosis irritet, farciat, laceret.

108 Inde haud raro intemperantes vel in motu, vel in cibis, alioqui bene valentes, quod Attilæ contigisse fertur, apoplexia prosternuntur. Quin adnotante Wepfero e decem, qui sibi non parcent, novem prædatrix abripit apoplexia.

109 Contraria quoque ratione eundem effectum pariunt cibi dulces, pingues, viscosi, frigidi, humore abundantes, male cocti, aquarum palustrum usus, cruditates e primis viis in sanguinem advestæ, evacuationes criticæ, consue-

D

tæque

tæque suppressæ, vita sedendo transacta, perspiratio impedita, vividarum potionum diuturnus abusus, mollis in agendo languor, metus denique ac tristitia.

110 Quæ mortalium natura, ætate, morbis, inertium, vel quorum est plus quam concoquant assumere, infirmant humores, redduntque ad motum ineptiores, adeoque facile in cerebri vasculis stagnaturos, exsudaturosque.

111 Narcotica, opium, boleti, nicotiana, crocus, carbonum fumus, musti cerevisiæque fermentescentium vivida vis, humores rarefaciendo, stagnationem advocant.

112 Scabies, materies arthritica & exanthematica refluens in sanguinem, enecant hominem e vestigio, ut in retrocessa podagra observamus.

113 Venenatæ item, pestiferæque particulæ cerebrum interdum gangræna subita corrumpunt: sive quod cerebri motum reprimant, sive quod spiritus inficiant, ut artis nostræ apud Anglos lumen Meadius suspicatur (28) sive quod pulmones aut convellant, aut inflamment ita, ut sanguinem illuc figant pari modo, ac risus immoderatus, qui pulmonem contrahens, circuitum sanguinis illico suspendit.

114 Epileptici, qui brevi interposita mora spasms vehementer tentantur, si in intervallis sopore, stupore, hebetudine animi, & corporis detineantur, incidunt in hunc morbum: eo quod sanguis a repetitis spasms fere indefinenter actus cerebrum vicissim feriat, quo prorsus tandem compresso, spasmsisque cessantibus, aditus præbetur apoplexiæ.

115 Eundem obitum obeunt non raro icterici, quorum sanguis stagnationi aptus est.

116 Pa-

(23) De peste cap. 2.



116 Parit apoplexiam & crapula, quæ stipatur nausea, borborigmi, intestinorum doloribus, urinæ suppressione: Helluonum enim potorumque ventriculus nimium distentus, arteriam magnam descendantem comprimit; unde ex sanguine uberius ad ascendentem fluente, vasa cerebri irritantur, & vel refertiuntur, vel lacerantur: Quo incommodo ex medicarum aquarum usu obesos, præsertim senes premi observat accuratissimus Lancisius. (29)

117 Diuturnarum animi sive in litteris, sive in gravibus negotiis, contentionum præmium haud insolens est apoplexia: Sanguis enim meditatione constanti orbatu rore, ferroque, quare per nervos ad spasmos hac de causa dispositos, cerebrum convulsioni; sæctuique obnoxium fit.

118 Casus ab alto, ictusve capiti inflictos, quin & supinum decubitum familiarem (30), somnumque immoderatum (31) consequitur interdum apoplexia: Dolor quoque vehementior crucians eos, quibus corrupta membra abscissurus chirurgus lædit locum qui sanus est.

119 Fœminis infert hunc morbum:

I. Uterus foetu nimium tumens, qui idem agit, ac in helluonibus venter.

120 II. Affectiones hystericae, quas præcesserunt lumborum sæpe dolor, borborigmi, ceteraque symptomata hisce incommodis familiaria; Licet ut admonuit immortale Angliæ decus Sydenhamius (32) hystericae fœminæ apoplexia tentari soleant post partum, qui fuerit aliquanto laboriosior.

D 2

121 Puer-

(29) De mort. sub. cap. XI. n. XVI.

(30) Alpin. de præfag. vit. & mort. lib. III. cap. III.

(31) Id. lib. I. cap. II.

(32) Dissert. epist. ad Cole. pag. 104. ad venet. in fol.

121 Puerperæ quoque meminit Duretus (33), quæ suppresso sanguine in puerperio interiit. Similium & Lancisius noster mentionem facit. (34)

122 Ætas, quam ex sententia Hippocratis (35) apoplexia frequentius impetit, est ab anno quadragesimo usque ad sexagesimum.

123 Hoc tamen haud perpetuum est, nam infantes, licet rarius, ea quoque corripiuntur.

124 Senes vero frequentius, quorum sanguis compactus est. Cum enim ii rigentibus membris sint, vitamque sedendo ut plurimum agant, hebetes sunt, cibos lente concoquunt, idcirco liquida per cerebrum lente fluunt, ac facile stagnant, quam ob causam ejusdem visceris vasa mirum non est si obstruantur.

125 Familiarius (36) pererrat loca palustria, humida, fossilibus scatentia, ventis australibus borealibusque per vires perflata, hyeme præsertim pluvia: coelo nebuloso, aut alternatim calente, ac frigente. E quibus causis pendent apoplexiæ, quas Baglivius (37) appellat *fece Epidemicas*.

126 Humores enim vario aëris pondere diversimode habiti, rarescunt facile, unde aucto motu, vel Sanctoriana perspiratione repressa cerebrum ultra modum inflant, apoplexiamque conciliant.

SE-

(33) Comm. in Holl. lib. i. de morb. intern. ad cap. 7.

(34) Lib. cit. cap. XI.

(35) Aphorif. Sect. VI. 57.

(36) Hippocr. de aër. aquis. & loc. & aphorif. sect. III. 23. ; Cels. lib. 2. cap. 1. Lancis. lib. cit. lib. 2. cap. II. III. IV.

(37) Dissert. VIII. de observat. anat. præct. appendice p. 682.

## S E C T I O I V .

127 **Q**uid apoplexia sit, quæ eam excitent causæ, quos effectus pariat, vidimus : Secernamus eam modo ab omnibus aliis morbis, quæ illi affines sunt.

128 Differt ergo I. a paralyti, licet remediis fere iisdem utrique succurratur. Omnes enim paralytici species, quæ innumeræ sunt (nam modo corpus integrum capite intacto modo dimidia corporis pars, modo brachia, pedes, oculi, aures, œsophagus, larynx, os, ventriculus, intestina, vesica, partes denique omnes nervis ornatae occupantur) gignuntur a vitio nervorum singularium infra eorum originem, non vero ab universali cerebri compressione, quæ peculiaris apoplexiæ causa est.

129 II. A. caro, quia etsi carotici eodem modo ac apoplectici profunde dormiant, succussi tamen vel puncti, aut clamoribus excitati oculos aperiunt, puncta membra retrahunt, interrogatis etsi inconcinne respondent, & licet illico clausis oculis profundo iterum somno corripiantur, haud stertunt, sed libere respirant.

130 Unde patet in iis nervei liquoris influxum non esse prorsus interceptum, sed tantum imminutum, ita ut fibrillæ nerveæ aliquanto tensæ cum sint, ab objectis valide, & vehementer impulsæ vibratilem motum suscipiant, licet spirituum in nervos influentium inopia continuo subsidentem.

131 Quapropter levis tantum perceptio excitatur, quam anima nequit satis discernere, hinc responsa non coherentia, & in somnum iterum prolapsus.

132 Apoplectici contra puncti, concussi, ustulati, motu, & sensu carent, perpetui somni imaginem præferentes.

133 Differt III. A comate somnolento seu cataphora, cujus symptomata a caro discrepant tantum in eo, quod comatosus excitatus interrogatis apposite respondeat, etsi iterum in somnum, quemadmodum in caro, statim relabatur.

134 Tensio enim, seu nervorum vibratio diutius durat in comate, quam in caro, nam impressiones ab objectis receptas, & ad emporium translatas anima clarius percipit, de iis judicat & loquelæ ope per apta responsa aliis significat; somnus vero profundus ideo redit, quia spirituum defectu nervi paulo post relaxantur.

135 IV. A lethargo seu veterno, & I. quia is ut plurimum est acutæ febris symptoma. II. Quia lethargici vi excitati oculos aperiunt, ac licet delirando, id est male de ideis perceptis judicantes, & incongrue respondentes, loquuntur tamen.

136 Etenim anima ad recte per sensus judicandum necesse est, ut accuratam idearum comparisonem instituat, itaque eas aliquanto temporis spatio debet considerare, cui rei fibrarum empōrii tensio, vibratioque necessaria est: per hanc enim ideæ & oriuntur, & permanent, & conferri inter se possunt.

137 Cum itaque in lethargo tensiones eædem fiant, sed diu non durent, hinc lethargicus iudicii, quod mox tulit, obliviscitur, antequam ad id, quod prioris sequela est, progrediatur. Unde videmus; ut ii vix petita matula ad mingendum obliviscantur se voluisse mingere; quin & matulam dimittunt e manibus.

138 In hoc morbo interdum nerveæ fibræ ita laxantur, ut etiam morbo superato pristinum tonum ac vibrationem recuperare vix valeant ; nam de iis, quæ tam in morbo, quam ante morbum egere , amplius non recordantur, ut pluries observatum est.

139 In apoplexia contra quamvis cerebrum inferum magis fit, oblitio tamen tanta difficilior occurrit.

140 Differt item V. A syncope, in qua facies pallet, respiratio vel prorsus cessat, vel observatur admodum levis, & arteriarum nulli pulsus cum sudore quandoque in fronte, ac cum extremitatum frigore,

141 VI. Tandem a suffocatione hysterica, in qua nec partes sunt prorsus resolutæ, nec tactio sublata ; Etenim hystericæ punctæ vulsæque significant se dolore affici : postque accessionem recordantur plerumque eorum, quæ sibi acciderunt. Nec mulieris a Vesalio dissectæ historia, siquidem vera esset, nobis refragatur.



DE

DE  
A P O P L E X I A  
P A R S S E C U N D A  
S E C T I O I.

1 **J**Am vero ad prognosin : Solent vulgo congeri hic ea omnia, quæ de judicio Hippocrates, ceterique medici sparsim pronunciarunt. At quoniam isthæc seorsim sumpta obscura sunt, propterea quod brevibus verbis comprehenduntur, quorum intellectus repetendus est a corporis ægrotantis præsentia, hinc mihi alia insedit sententia.

2 Ordiendum itaque censeo ab universi morbi historia, ut quid in quoquo morbi statu sperandum, quid timendum sit, perspiciatur illico. Inde fiet, ut quandocumque advocati simus, valeamus certo prænosceret, quid in nostra potestate habeamus, quid aliis polliceamur.

3 Haud enim medici officium est, ut plebs arbitratur, morbos omnes curare; Medicus namque, ut mortales ceteri, viribus naturæ subest, quas vincere pro arbitrio nequit.

4 Hinc si natura morbi validior fuerit, quam ut superari possit, haud plus fiduciæ collocandum in arte, ac in quacumque re vel vilissima. Id autem medentis officium est, dignoscere nempe, quando ægris opitulandum, quando contra a remediis propinandis abstinendum. Artifex enim temere judicans, quod utinam raro eveniret, infamat se, artemque.

5 Eapropter Hippocrates prudentissime ait : (38) *Medicinam quidem esse, quæ in totum a morbis agros vindicat, morborumque vehementiam obtundat : At quæ neque iis, qui a morbo vixi sunt, manum admoveat, cum id medicinam præstare non posse probe conflet.*

6 Itaque ne vulgi ludibrium fatuitate nostra fiamus ( nam qui, ut Præceptor ait, (39) *prædictionis successum consequutus sit, apud prudentem agrum admirationi erit : qui vero deerraverit, præterquam quod odio gravabitur, is ne insania quidem suspicionem effugere poterit* ) accuratam morbi hujus descriptionem proponemus, Bellini ordinem (40) sequuti : qui eam in signa, quæ præcedunt, comitantur, consequuntur, divisit. Eo enim fiet, ut corpus ab origine morbi usque ad exitum oculis mendentium subjiciamus.

7 Nec quis a nobis expectet, ut ratiunculas, quare unumquodque accadat, conquiramus, quod in superiori parte exercitationis gratia fecimus. Turpe enim esset in re gravissima, ut ingenio velificemur fortasse nugari. Liberum cuique esto, in hoc verbis quam volet plurimis efficiendo laudem captare. Nobis de salute hominum tantum sollicitis, erit satis Hippocratem, qui ad juvenilia isthæc nunquam descendit, imitari. Cujus viri beneficio, quotquot hætenus ægrotarunt, convaluerunt.

## 8 Apoplexiam igitur præcedunt

I. Somnus altus, cum incubo dentium stridore & ronchis : ut nosmet bis observavimus.

9 II. Defatigatione corporis nulla prægressa, dolor capitis vehemens, stimulus ad vomitum, perseverans diu, re-

E

me-

(38) De arte §. IV.

(39) Libr. 2. prædict. n. 3.

(40) De morbis capitis.

mediis non cedens: Cujus rei funestum exemplum habeo. Præbyter plethoricus cubiculum meum ingressus, ut ad diuturnum capitis dolorem opem a me peteret, dum loquitur, corruit repente exstinctus, ita ut frustra scalpellum ad sanguinem extrahendum eduxerim. In quo utrosque cerebri ventriculos sanguine quam maxime repletos cadavere dissecto observavi. Hoc tamen haud perpetuo apoplexiam prænunciat: Fœmina enim, quam curandam frustra suscepam, haud prius dolore capitis acerbo levata est, quam pus ex intimo oculorum, quos penitus exedit, eruperit sponte; quo factò integre convaleuit.

10 III. Memoriae antea felicitis manifesta defectio.

11 IV. Caput obtusum: Sopor, maculae muscarum specie, sine cataractæ aut amauroseos signo, oculis obversantes. Lachrymæ sponte fluentes; quodcumque ophthalmia, carunculæ lachrymalis erosio, morbus acutus absint. Epiphora gravior.

12 V. Vertigo tenebricosa cum stando, tum caput inclinando, stomacho haud oppleto, rectursans. Senes ex cerebri, nervorumque decubitu cæci, si post hiemale solstitium noctu splendorem putent se eundem videre, facile cum Sol Taurum ingreditur, apoplexiam lethalem sentiunt. (41)

13 Inter legendum deerratio a linea, cum prius id non acciderit, & neque crapula, nec tabaci abusus præcesserint.

14 VI. Aurium susurrus, tinnitus, bombus, quos in loco humido, aut calce recenter obducto habitatio non procrearit.

VII. Balbuties, lingua haud vitata; vox tarda; respon-

(41) Lancis lib. cit. cap. XX, n. 7.



sa impexa. Os distortum, satuitas vel nativa, vel subsequens. Epilepsia frequentior. Mæror, angorque animi constans.

15 Ut enim post Hippocratem Alpinus (42) observat, cum in iis, quos diuturnus morbus vexaverit, tum in iis, qui nondum ægrotant, sonitus aurium plerumque magni morbum portendit; præsertim si capitis dolor, gravitas, vertigo, vocisve tarditas, manuumve torpor simul vel post appareant; tunc enim apoplexiam, epilepsiam, oblivionem instare censendum est.

16 VIII. In deglutitione difficultas, vel stimulus ad tussim, nulla conspicua faucium inflammatione, œsophagi tumore, vel convulsionibus, quales hystericis scæminis adveniunt: Dolor item in ore ventriculi cum præcordiorum distentione, capitis dolore, anhelituque.

17 IX. Animæ repetita defectio (43); alterutrius lateris imbecillitas cum torpore, qui sine ulla partium compressione ac tumore recurrit. (44)

18 X. Intermediæ brachiorum pedumque partes sponte vicissim frigentes calentesve. Tactio depravata, manus in scribendo velox antea, mox minus obsequens.

19 XI. Corporis tremor spontaneus, præsertim in juvenibus, firmisque. Lumbago: a modico incessu lassitudo: pedes infirmi, vacillantes, repentes. Post capitis vulnera contusionesque rigor.

20 XII. Catoche, diuturnique horrores, dummodo citra febrim sint, morbum hunc quandoque genuerunt.

E 2

21 Adno-

(42) De prælag. vit. & mort. lib. II. cap. 10.

(43) Hippocrates aphorism. Sect. II. 41.

(44) Galen, in coac. prænot. text. 476.

21 Adnotavimus hic singula, quæ instantem apoplexiam significasse observatum est. Haud tamen existimemus oportere, ut universa isthæc necessario coacerventur, ad futuri morbi prædictionem. Satis enim est aliqua ex iis vitiis sæpiusculè animadverti, ut cum ratione funestum quid suscipiemur.

## SECTION II.

22 **A**D apoplexiam ipsam modo accedamus. Volentibus nobis eam describere, occurrit primo dubitatio quædam, utrum nempe conveniat illam in plura genera partiti, deinde quot sint ista genera.

23 Solenne veteribus fuit eam in sanguineam, & pituitosam discriminare. Malpighius (45) contra immortalis memoriæ vir distributionem hanc irrisit, quoniam id, quod vasis continetur, sanguis est, qui etsi eruperit, naturam suam non exiit.

24 Attanti viri, cujus doctrinam veneror, pace, Antiqui inique vapulant, opinor. Licet enim humorum nostrorum massa uniusmodi sit, partibus tamen natura inter se diversis constat, quæ facili de causa sejunguntur. Compertumque anatomicis est in apoplecticorum cerebro exstare congestiones humoris nomine sanguinis haud donandas.

25 Malpighium, quem nil fere ad humanum corpus spectans latebat, ignorasse id, quod aliis patuerat, absit, ut dicam. Itaque crediderim ipsum putidæ Galenicorum petulantiae pertæsum irrisisse pituitam eam, quam in cerebri sinibus, veluti in propria sede, locarant homines isti, nec ausi dubitare, posse magistrum, quem ipsi elegerant, errare.

26 Quid-

(45) Oper. posth. pag. 219. ed Amstel. 1700. in 4to.

26 Quidquid autem de hac controversia sit, certum est divisionem hanc, quam ex temperamentorum varietate desumserunt observatores, plurimum ad curandum conferre: cum sanguineis diverso modo ac phlegmaticis succurratur. Hinc contemnenda ea non est, præsertim cum Baglivius noster (46) & deinceps multiplici scientia apud omnes gentes clarus vir Boerhavius (47) eandem calculo suo comprobant.

26 Attamen quoniam cavendum diligentissime est, ut in arte omnia sint quam perspicua, ne tenebræ, si quæ nobis suboriuntur, humano generi perniciem afferant, experientissimi Hoffmanni, quem veluti Germaniæ nostræ Hippocratem Europa tota merito veneratur, distributionem (48) reor amplectendam.

28 Ad eam enim, ni fallor, referri percommode possunt universa, quæ in hoc morbo evenisse adnotatum est.

29 Prima igitur etiam a nobis spastica, altera serosa: tertia sanguinea appellabitur.

30 Uniuscujusque effectus ab origine ad exitum inspicimus: Primo, quales sese produnt cum morbus sibi relictus agit sponte sua vi legum naturæ: dispecturi postea quid accadat, cum medicamenta corpori adhibentur.

31 Incipiamus a sanguinea, quo nomine intelligitur illa, quæ fit, cum sanguis diffractis cerebri vasis, eas propter causas, quas superius memoravimus, erupit.

32 Admonendi sumus in antecessum: id cuique commu-  
E 3 ne

(46) Præceos medicæ lib. I. de apoplexia pag. 110. Noremberg. 1751. in 4to.

(47) Aphorism. de cognosc. & curand. morb. n. 1700.

(48) Med. rat. system. tom. IV. part. II. sect. 1. cap. VII. & tom. IV. part. IV. cap. I.

ne esse, ut homo concidat insensilis, immobilis: Quod dictum volo, ne lectorem supervacanea ejusdem rei repetitione obtundamus.

33 Præcedunt eam interdum dolor capitis, vertigo, tinnitus aurium, similesque sanguinis in cerebro redundantis effectus, si quando tamen vitium est in solidis partibus, vel sensim succrescit. At si repentina quæ causa sanguinem violenter ad superna truserit, prænuncia signa non conspiciuntur.

34 Homo itaque corruit ore hiante, palpebris suspensis, genis rubentibus, turgentibus cum facie, tum illius vasis, quæ, præsertim post mortem, disrupta sanguinem ex ore, naribus, auribus fundunt.

35 Procedente morbo sphincter ani vesicæ solvitur, excrementa, urinaque effluit. Oculi rigent quasi vitrei, prominentque, pulsus languet, rarescitque, respiratio imminuitur, subeunt ronchi fortissimi: Denique dentium stridorem ut plurimum convulsionesque mors sequitur.

36 Serosam, eam scilicet, quæ ex sero lymphæ per propriorum vasorum disruptionem erumpente, vel per eorum poros exsudante in phlegmaticis, debilibus, senibus potissimum oritur, præcedunt vertigo, speciatim pomeridiana & nocturna, scotomiæ conjuncta, torpores, hebetudines, balbuties, sopor.

37 Qui ea corripiuntur, sermonis usu haud statim privantur, tum artus flaccescunt, frigentque: oculi quidem & os quandoque panduntur: At sanguifera vasa, quod illi peculiare, evanescent, corpus faciesque pallefcunt, respiratio denique pulsusque variant.

38 Spasticam seu eam, quam sanguis in plethoricorum, hypochondriacorum, nephriticorum, hysteriarum &c. vasis subsistens advocat, ingruere admonent externorum sensuum imbecillitas, vertigo tenebricosa, artuum gravitas, tremor, torpor, affectiones denique hypochondriacæ, hystericaeque graviores diuturnioresque.

39 Cum illa irruit, extrema corporis cum superna tum inferna frigent, cutis arefcit, spasmusque constringitur, facies, oculique rubent, arteriæ valide, celeriterque pulsant.

40 Hæc est cujusque species: Quam qui intuetur, fieri non potest, quin primo inspectu, qualis morbus sit, a quibusque causis excitetur, ignoret.

41 Inquiramus modo, qualis sit earum exitus, ut via ad curationem sternatur, quo artis nostræ vestigatio omnis collimat.

42 Generatim refertur apoplexia ad morbos acutissimos: Cursum enim suum brevissimo tempore absolvit.

43 Quippe senes, potissimum plethoricos, desidesque, tum eos, quorum cerebrum a seminio, vel a morbo debilitatum est trium vel ad summum septem dierum spatio conficit, ut Hippocrates (49) Cæliusque Aurelianus (50) adnotarunt.

44 In ceteris vero citius tardiusve solvitur, prout major vel minor inest in quocumque corpore firmitas.

45 Sanguinea itaque difficile est, quin homines enecet. Fieri enim profecto nullo pacto potest, ut sanguinea vasa præcipue

(49) Coac. prænot. 187.

(50) Acutor. lib. II.

cipue arteriosa semel disrupta ita conglutinentur, ut sanguis fistatur, quique erupit, discutiatur e cerebro. Ii vero, quibus vasa sub calvariam disrupta sunt, vitam solent ad aliquot horas protrahere. Contra quæ intra præcordia diffinguntur, hominem illico de medio tollunt.

46 Serosa quoque mortales *orcio tradit thesauro*: Attamen quandoque iis parcit, sive quod serum resorbeatur, sive quod per spinalem medullam derivetur, sive quod tantum non sit, ut cerebrum totum comprimat, vel saltem spirituum confectionem, distributionemque prorsus non impediat. Eos vero hemiplexia, graviori paralyfi, oblivione, fatuitate, languore afficit.

47 Spastica plerumque post horas aliquot ultronea viscosæ materiæ vomitione, sudore universali copioso, urina, similibusque excretionibus abit, nulla plerumque sui relicta nota, vel tantum levissima in ore, lingua, aliisque corporis membris. Nisi forte vasa sciderit, ut in apoplexia ex epilepsia, quam sæpe mors continuo subsequitur.

48 Utraque tamen ita cerebrum infirmat, ut serosa tacti, quoniam nervi debitam sibi vibrandi vim recuperare non possunt, vel iterum æquinoctii, solstitii, aut novilunii tempore incidant in apoplexiam plerumque sanguineam, vel hydrope insanabili interimantur.

49 Alteri nisi sibi magnopere caverint, apoplexiæ adventum haud effugiant.

50 Placuit Hippocrati (51) apoplexiam in duos gradus dispertire, ut alteram diceret levem, difficile curabilem, alteram validam, quam curare non est possibile. Nobis vero quatuor illius gradus constituere Galeno auctore (52) visum est.

(51) 2. aphorism. 42. & 3. de loc. affect. 7.

(52) Commentarius in loc. Hippocr. citat,

51 In hos respirationis præcipue pulsus, coloris differentias, ceteraque symptomata, e quibus judicia de morbi qualitate, periculique magnitudine repetuntur, conferemus.

52 Quodcumque igitur respiratio liberior quadante-  
nus est, pulsus ordine sibi succedunt, color faciei nativo  
propior, corpus calens, apoplexia *levissima* dicenda est.

53 Quod si respiratio ac pulsus inæquales sint, inter-  
mittantque, color immutetur, corpus frigescat, *levis* erit.

54 Si vero spiritus difficulter admodum trahatur, pul-  
sus durus sit, variusque, color depereat, corpus gelascit,  
dicetur *valida*.

55 Denique cum nec respiratio, nec pulsus sensu de-  
prehendantur, facies cadaver exprimat, frigidus erumpat  
sudor, spuma in ore appareat, sphincteres ani & vesicæ re-  
solvantur omnino, ronchi sint vehementissimi, vel etiam si  
ii supprimantur, tamen cetera eodem modo se habeant, *acutis-  
sima, validissimaque* apoplexia nominanda est.

56 De primis duobus gradibus bene sperare licet. Cor-  
pus enim haud ita prostratum est, ut medicamentis adjutum  
resistere morbo non possit.

57 In tertio tentandum quid est, ut saltem æger, si  
per nos potest, præsentem Libitinam evadat.

58 Quod si ad ultimum deveniatur, conclamatum est.

59 Quoniam vero immisericordes imperitæ multitudini  
videremur, si manum etiam deploratis admoveere recusamus,  
caveamus, ne dum aliorum importunitati morem gerimus,  
imprudentiæ notam incurramus.

## S E C T I O III.

60 **A**D ægrum itaque ut accedimus, jubeamus eum locari in conclavi lucido ac tepente, corporis trunco, capiteque paulisper erecto, pedibus tectis.

61 Interea, siquidem commode id fieri poterit, inquiremus qua temperie, ætate, sexu is sit, quo habitu, quam vitæ rationem, dum valebat, inierit. Tum quæ causa morbum fecerit : quæ denique fuerint, Sintque vires.

62 Negliguntur sæpe hæc omnia, cum ab iis, qui in operiosiori anhelitu sollicitudinem suam collocant, ut inde stupenti vulgo diligentiores, si Diis placet, videantur: Tum ab iis, qui presentissimum omnibus locis temporibusque remedium in medicamento quopiam, quod adamant, contineri arbitrantur. (\*)

63 Quorum alterum est turpissimum, alterum stolidissimum : Utrumque certe prudenti artifice indignum, & summopere coarguendum.

64 Quis enim ferat hominem, (\*) qui salutarem artem professus hac illac furenter discurrit, ut obvium quemcumque vel jugulet, vel ad minimum cornu impetat ?

65 Talis enim dicendus est ille, qui Ardelionum more omnia, quæ ei in mentem veniunt, promit indiscrete, miscetque : Vel, quod pejus est, eadem formula plethoricos, phlegmaticos, juvenes, senes, mares, foeminas, acutos morbos, vetustos complectitur.

66 Ali-

(\*) Vid. Boerhav. orationes.

(\*) Ibidem.



66 *Aliter enim, ut apud Celsum (53) nostrum est, acutus morbis medendum, aliter vetustis: aliter incrementibus, aliter subsistentibus: aliter jam ad sanitatem inclinantibus: . . . quia non eadem omnibus etiam in similibus casibus, opitulantur . . . Estque etiam proprium aliquid & loci & temporis.*

67 Sollicitos eapropter convenit nos esse, ut inscientia arrogantiae nostrae, neque reipublicae, neque si hujus vindictam forte effugerimus: Deo omnia pervidenti obstringamur. Si enim ager, ut inquit Hippocrates (54) propterea quod medicus morbum, vel recte non curet, vel non cognoscat, a morbo superetur, medici culpa est.

68 Multiplices siquidem apoplexiæ causæ; multiplices itaque via tractanda quælibet. Nam sympathicæ curatu faciliores idiopathicis: istæ vero cum solidarum partium vitio vel nativo vel adventitio fiunt, censendæ sunt plerumque insanabiles.

69 Nos itaque, ut ista vitemus, circumspiciemus singula: naturam præsertim corporum; Ad eam enim accommodanda curatio est. Quia ut recte Celsus (55) alii graciles, alii obesi sunt: alii calidi, alii frigidiores, alii humidi, alii sicciores: alios adstricta, alios resoluta alvus exercet. Raro quisquam non aliquam partem corporis imbecillam habet. Hinc manifestum est illa, quæ sanguineo, bilioso profunt, nocere phlegmatico, melancholicove, & vicissim.

70 Nihilominus illud Celsi (56) meminerimus: Si nulum appareat aliud auxilium; periturusque sit, qui laborat, nisi temeraria quoque via fuerit adjutus; in hoc statu satius est anceps auxilium ex-

F 2

periri,

(53) Præf. lib. I.

(54) De affect. sect. V. Foef.

(55) Lib. I. cap. 3.

(56) Lib. II. cap. 2.

*periri, quam nullum.* Qua sententia certe nihil prudentius : Quandoquidem ea cum judicio utamur.

71 In hoc morbo occasio præceps est, & haud minimum commodi a prompta celerique auxiliorum administratione expectandum.

72 Cum itaque ab infero cerebro apoplexia ortum ducat, potissima cura sit, remove, quod fertur : Quo confert humorum imminutio.

73 Sanguinis ergo detractio, nulla interposita mora, instituitur. In hoc quantum præsidii cum hic, tum alibi sit, ostendit natura, suadet ratio, confirmat medicorum omnis ævi consensus.

74 Nisi forsitan quotidianis experimentis, solidisque magni Bellinii (57) ratiocinationibus ex penitiori humani corporis structura petitis, exsucca Helmontii, hominis certe ingeniosi, & in chymicis docti, sed in anatomicis, & physiologicis delirantis phantasmata in re tam gravi præferamus.

75 Copiosior certe ea debet esse : hinc vulnus sit latissimum, quo sanguis confertim effluat. Quantitatem e viribus æstimabimus : Quod definiendum prudenti medico permittimus. Plethorici quidem, biliosi, juvenes, quoniam sanguine abundant, florensque corpus habent, expetunt largiorem.

76 Nostis hominibus, quippe qui liberalius victitant, plurimum sanguinis mittitur sine præsentis noxa : Quo naturæ dono utinam vulgares medici, qui, bonis licet indignantibus, venas vel joculariter referant, non abuterentur.

77 Re-

(57) De sanguinis missione.

77 Recusant quidam sanguinem mittere phlegmaticis, melancholicis, senibus, pueris, gravidæ mulieri: verentur enim, ne vires per se jam fractæ pessumdentur.

78 At iis repugnat auctoritas, & experientia. Hippocrates (58) enim, Celsus Aurelianus, (59) Aretæus (60), ut nostros præteream, ubicumque morbus sanguinem desiderat, præcipiunt ut mittatur, nulla habita ratione ætatis, sexus, vel temperamenti: Solliciti id unum monuisse, ut ægri vires exploremus; Ita ut nihilo plus detrahamus, quam sine incommodo, homo, si valeret, pertulisset.

79 Quod observationi quotidianæ respondet. Videmus enim passim e naribus, hæmorrhoidibusque imbecillimi cujusque fluere sanguinem ubertim, nulla virium dejectione subsecuta. Hinc nos nunquam dubitavimus, quandocumque casus id tulit, cædere venas, felici non sine eventu.

80 Neque deterrendi sumus a pulsus sive intermissione, sive inæqualitate, ac si id vires prostratas indicarat. Hoc nempe vanum est, nisi aliunde pateat vires periisse: Ut doctissimus, mihiq; dum in vivis esset, amicissimus Petrus de Rotundis Reatinus Regionum Hispaniarum Infantum olim Medicus animadvertit, dum ait: (61) *Si vires onere potius premantur, obscurenturque (quod fere solet per morbi initia) audacter, modo res postulet, sanguinem detrahe. Et enim hoc imminuto illas non imminues, sed extricabis, excitabisque. Vires enim opprimis plenitudo ipsa, quique hanc consequitur lentor, atque canaliculorum obstructio. Exsolvant, inedia, immodica qualibet exinanitio, longa vigilia, morbi tum vebementia, tum diuturnitas, aliæque ejusmodi evidentes causæ, item & maligni (sic vocant) afflatus, rerumque venenosarum vel halitus, vel*

F 3

consta-

(58) De vict. rat. in acut.

(59) Lib. 2. cap. 10.

(60) Lib. 1. de cur. acut. cap. 4.

(61) De vict. rat. in febri acuta continua parte II. pag. 88.

*contagium.* Quæ quam sapienter dicta sint, intelligent ii tantum, qui sincera artis præcepta, non in umbratili aliqua palæstra, sed in propatulo, interque ægrotantium sordes, squalloremque perdidicerunt.

81 Ut denique hanc de quantitate sanguinis disputationem absolvamus, proferemus Rotundii nostra effata duo: ne quid in hac re ultra desideretur. (62) *Si moderate langueant vires, sed langueant tamen & expediat etiamnum sanguinem detrabi, tantum paulatim, & per intercapedines detrahes; quanto satis propositio facias, nec precipites superstes qualesquales erunt.* Si vere & funditus ea languent (quæcumque denum languoris causa fuerit) omnino abstinebis: Loco vero mittendi sanguinis tuum erit exquirere, quod rei præsentis convenire maxime conjectabis: De his enim intelligendum censeo illud Celsi: (63) *Si omnia membra resoluta sunt, sanguinis detraçtio vel occidit, vel liberat.*

82 Circumspecte itaque decet nos agere in efficacissimi hujus auxilii administratione: Nam ut magnus ille Lotharungus, a cujus elaboratis operibus ipsemet Boerhavius (64) se admodum adjutum fatetur, Nicolaus Piso, pacis bellicque artibus nobilissimo Principi suo CAROLO II. Augusti Magnanimi, Pii, Felicis FRANCISCI I. Cæsaris Atavo præclarissimo medicinam olim faciens, pronunciat consultissime: (65) *Si plus equo detraxeris, hominem jugulasti: sin minus, adhuc causa perminet: Magno ergo judicio opus est in modo conjectando.* Quod intelligentissimi viri oraculum, ubicumque de sanguine agitur, præ oculis habeatur, volo.

83 De loco, qui secandus sit, disputatur. Sunt, qui anteferunt arterias, alii contendunt sufficere venas. Plures toti

(62) Loc. cit.

(63) Lib. 3. cap. 27.

(64) Libri præf.

(65) De morbis cognoscendis & curandis I. I. cap. XVI. p. 103. ed. Boerhav.

toti sunt in designandis venis, ne receptæ inter medicos de revulsione derivationeque doctrinæ derogetur. Quid hac de re ego sentiam, pandam paucis.

84 Arteriarum sectioni equidem non repugnaverim. Subtrahitur per ipsas sanguis, ita ut fluxio ad cerebrum, & inde enascens vasorum irritamentum cessent: Unde fibræ depletione retensæ contractilitatem recuperent; cujus operæ sanguis, qui in cerebro confluerat, circumagatur liberius. At quam multæ eæ sunt? Temporales vereor an prodesse tantopere possint: at amen quoniam maximus Anatomicus Heisterus (66) secatas vult, pertundantur: Etiam si ipsemet iis non multum tribuat. (67)

85 Remanent occipitales, & de facto has Anatomicorum, ut Senacius (68) inquit, supremus arbiter Morgagnus (69) secatas vellet. Recte quidem. Verum qui humani corporis structuram callet, novit, quam difficile sit ad tale auxilium pro opportunitate decurrere. Quod & sapientissimus vir candide, ut solet, fatetur.

86 Propterea descendemus ad venas. Animus mihi non est increpare eos, qui saphenæ, medianæ, & siquidem arteria in tuto sit, basilicæ confidunt. Incisio illarum certe fructu non caret.

87 Attamen nobis quærenda brevissima via, qua cerebrum expeditissime depleamus, ut concretionēs, quæ in duræ matris sinubus fieri solent, avertantur.

88 Quid ergo obstabit, quominus jugulares tundamus, post-

(66) Comp. med. pract. cap. XIV. n. 32.

(67) Inst. chir. part. II. sect. II. cap. 39. n. 4. adnot.

(68) De la struct. du coeur. prefac. p. XIV. & tom. I. p. 81. 162, tom. II. p. 614.

(69) Advers. anat. VI. p. 108.

postquam egregius inter præstantissimos ætatis nostræ Medicos Freindus (70) sectionis hujus utilitatem rationibus anatomicis demonstravit : Ego sane id a Lancisio (71) cujus doctrina, dum addiscendæ Medicinæ causa Romæ commorarer, uti mihi fauste contigit, edoctus, nunquam quoties sese obtulit occasio, isthoc neglexi. Quod gratulor haud improspere mihi successisse, ac præsertim dum Rhætis ante hos viginti annos publicis stipendiis medicarer.

89 Haud incelebris, enim apud Tridentinos Jurisconsultus apoplexia gravi correptus, quem vulgares missiones sanguinis non juverant, instituta tandem manu mea jugularium sectione, ornatissimo Tridentinorum Antistite ac Principe Antonio Comite Thunnio, honoratorum Fratrum Firmianorum avunculo, præsentē, cum illico levatus est, tum brevi civibus suis est restitutus.

90 Cujus facti mentionem, cum propter meum erga amicum patriamque amorem, tum propter Hominum genere, doctrinæ, moribus, dignitatibus illustrium recordationem, ut mihi jucundissimam, ita gloriationis vitio tributum non iri confido.

91 Nec est, ut ab ea metuamus nescio quem futurum cerebri e subita depletione stuporem, siquidem ægro intentis oculis affideamus.

92 Jugularium tamen sectio, in obesis præcipue, difficilior perficitur : Ideo si minus hanc adhibere concedatur, præsto sint brachia, pedes, venæ frontis, nasi, ac præcipue sublinguales, quas utiles & Lancisius (72) & ego nuper experti sumus.

(70) De febribus, comm. II.

(71) Vid. ejus libr. de morb. sub.

(72) Lib. cit. observ. I. IV.

93 Sanctum Medicis est rationem habendam quammaxime revulsionis, derivationisque; ita ut piaculum ipsis foret secare brachium antequam sanguis mittatur e pede.

94 Opinioni a veteribus haustæ, Bellinii (73) ratiocinationi suffultæ; medicorum calculo firmatæ contraire, periculo non vacat.

95 Etenim si adversus has præceptiones committatur aliquid, cui res non responderit, quod in ancipiti hoc morbo non raro evenit; fieri nequit, quin ab omnibus tanquam violatarum artis legum rei, condemnemur.

96 Propterea admonebimus dumtaxat medentes, ut quæ de revulsione ac derivatione Senacius (74) habet, perpendant sedulo: cum vita hominis, quo nihil pretiosius concessum mortalibus est, mereatur, ut etiam ea, quæ receptis sententiis adversari opinamur, examinemus.

97 Si sanguinis emissionē repetito opus fuerit, vel quod vasa nimium turgeant, vel quod pulsus durus magnusque sit, ægerque non levetur, protrahere eam ultra tres horas à prima non licet. Tunc enim profuturam ad cerebri repletionem minuendam præter rationes, quæ hoc suadent, experientia propria edoctus sum.

98 Scarificatæ siccatæque cucurbitulæ femoribus, pedibus, brachiis, occipiti appositæ profunt quamplurimum. Quæ posterioribus thoracis partibus admoventur, damnata sunt, ea de causa, quod per eas exiguus, qui adhuc superest, musculis respirationi inservientibus motus penitus extinguatur.

G

99 Te-

(73) De sanguinis missione.

(4) De la struct. du coeur, tom. I. p. 144. & 147. & anatomie d'Heister.

99 Testatur Hippocrates (75) attonitis hæmorrhoides si supervenerint, utiles esse. Idcirco hirudines, præsertim si ab hæmorrhoidum repressione apoplexia oriatur, applicentur sedi.

100 Quarum virtus tanta est, ut efficiant solæ id, quod scalpellum interdum vix potest. Nam applicitæ corpori universo attonitum, cui ob nimiam obesitatem venæ non exstabant, restituerunt. (76)

101 Filium quoque meum, qui medicinam modo facit, angina, nono ætatis suæ mense perstrictum, ita ut neque lac fugere, vixque spiritum trahere posset, tracto ex jugularibus sanguine, sanum reddiderunt.

102 Eas ergo commendatas volo in puerorum, gravidarum mulierum, quorumcumque denique ætate, sexu, morbo, minus valentium corporum curatione. Apponantur vero interioribus brachii utriusque partibus, jugularibusque venis, quot intentioni nostræ sufficiant.

103 Quæ, præter sanguinis missionem, faciunt ad imminuendos, derivandosque humores, sunt purgativa, balani, vomitoria: De his singillatim loquendum.

104 Purgativa etsi necessaria, non tamen omnibus eadem, vel eodem modo conveniunt: Cuique ergo per experitum medicum attemperentur. Nobis quid generatim factò opus sit, sufficiat indicasse.

105 Corpora igitur plethoricorum, phlegmaticorum, comedonum, quæ denique humoribus scatent, liberalius irritare oportet: Clysteria itaque parentur ex agarico vel collo-

(75) Coac. prænot.

(76) Valesc. de Tarant. lib. 1. cap. 19.



locynthidis pulpa nodulo inclusa, coctis in aquæ fontanæ, urinæque partibus æqualibus, addito sale gemmæ, Benedictæ laxativa, vel sale communi. Item alia e foliis fennæ cum suis stipitibus decoctæ, addito helleboro nigro, agaricoque trochiscato. Præferunt alii decoctum fiorum chamomillæ cum vino albo optimo, cui metallorum crocum infundunt.

106 Quoniam vero, quæ injiciuntur, stimulare valide debent, removebimus oleum. Nihil enim medicamentorum, quin & venenorum, acrimoniam retundit magis, ac pinguis & valde humida.

107 Contra : Si biliosa temperie præditum hominem ira actum vehementi apoplexia perstrinxit, cessare a purgativis, quæ mochlica vocant medici, penitus convenit.

108 Stimulos enim adderent fibris, spiritibusque, unde effrænatus in gyrum abriperetur sanguis, affatim deinde in cerebro stagnaturus.

109 Nocent ea pariter apoplexiæ, quæ nocturnis lucubrationibus, Venere, vigiliis, morbis confecta corpora pervadit : Purgatoriis enim vehementioribus nervi illorum, propterea quod exsucciti sunt, efficerentur spastici. Utrisque igitur porrigito largas ptisanas laxantes ex cassia, tamarindis, mannaque calabrica, quæ biliosam acritudinem per inferiora averrant.

110 Purgationum tempus opportunum esto, cum primum sanguinem detraxeris. Hinc protollere hoc remedii genus nefas habeto.

111 Expedit autem clysteres infundere parcos quidem, sed frequentes, ut alvus repetitis stimulis irritata votis nostris

stris obsecundet. Id enim propositum nobis esse debet, ut diarrhæam morbis capitis Hippocrate auctore (77) saluberrimam totis viribus provocemus.

112 Cui rei post administrata superiora, aptas censemus purgationes ex Rhabarbaro, senna, cassia, tamarindis, mannaque calabrica, addito electuario diacarthami, pilulis de succino Cratonis, vel magisterio mechoacannæ, unove, aut altero grano trochiscorum alhandal. Eæ siquidem subductionem, quam priora inchoarunt, perficient successive.

113 Accidit interea, ut ob æsophagi musculos, anique sphincteres prorsus resolutos ægri deglutire nequeant, clysteresque vel non possint injici, vel injecti si fuerint, effluant statim.

114 Tunc etsi lethale signum appareat, non quidem decet animum despondere, inceptoque desistere: sed balanis manum admoveamus, quæ conficiuntur pulvere radices jalappæ, sale gemmæ ac melle:

115 Describam hic suppositorium Piperi (78), quod ego utor. Recipe trochiscorum alhandal, agarici trochiscati anadrachmam unam. Hellebori nigri, foliorum sennæ anadrachmam semis. Salis gemmæ, nitri, anascrupulum unum. Mellis quantum satis. Fiant lege artis duo suppositoria satis longa filis appensis. Hæc renoventur identidem, ne inertia fiant.

116 De vomitoriis paulo fusiùs differam: Quoniam id remedii genus per se salutare, ægros imprudenti medentium dispensatione frequenter evertit.

117 Hic-

(77) Sect. VII. aphor. 5.

(78) Addit. ad Mynsicht.

117 Hicce evacuationis per superna ciendæ modus commendatur summopere in apoplexia a quibusdam, usis auctoritate Riverii & Helmontii, qui tempestivis vomitoriis apoplecticos restitutos scribunt; tuenturque se nota illa Celsi sententia, quam & nos paulo ante retulimus: in desperato nempe casu satius esse anceps remedium experiri, quam nullum.

118 Ego quidem experimenta Riverii, Helmontique non inficior: Consentioque Celsi dicto, quo nihil prudentius. At vellem. ut qui illorum patrocinio in hominum vitam impune grassantur, animo secum reputarent, utrum id remedii genus in quacumque apoplexia sit ita proficuum, quemadmodum ipsi sesquipedalibus verbis jactitant.

119 Certum quippe est primo, ut elegantissimis Rotundii verbis utar: (79) *Haud tuto vomere eos, insueti qui sint, qui obeso corpore, brevique collo & carnoso, qui ventrosi, qui arcto pectore, qui difficile id anxieque ferunt; neque tutius eos, quorum vena plenitudine distenduntur: Minus vero illos, qui sanguinem vomere, vel extussisse consueverunt, vel alio quolibet pulmonum vitio laborant; quique oculorum graviore aliquo affectu conficiantur: siccoque & imbecillo sunt capite. Sed neque ruptis, berniosisque utilis hujusmodi curatio est: neque per hiemem facilis, nisi vel austrina tempestate, vel in tepenti, vaporosoque conclavi.*

120 Quandocumque igitur metuimus, ne violento vomendi nisu parti corporis cuicumque debilitatæ noxam inferamus; jubet ratio, ut de vomitoriis propinandis non cogitemus.

121 Qui itaque illa proponemus in apoplexia, postquam scierimus oriri eam a cerebri vasis, vel nimium tentis, vel ruptis? eritne in potestate nostra vomitorium ita temperare, ut ventriculum, vicinasque partes convellat, cerebrum in-

G 3

ta-

(79) De vi&lt. rat. part. III. p. 104.

taſtum relinquat ? nonne perſpicimus inflari vomentis oculos, os, tempora, ut videatur diſruptionis periculum validiori cuique imminere ? Turgentia itaque diſrumpemus, diſrupta dilatabimus, humoresque in cerebrum, unde eos evocandos fuſceperamus, propellemus.

122 Præterea qui vitari poterit, ne ventriculus a vomitoriis actus, inflatus, tenſus, æſtuans premat diaphragma, pulmones arctet, cordis ſemitas, quas pervias eſſe convenit, perſtringat, infelixque æger tot inter colluſtationes, conatusque ſuffocetur : Præſertim cum partes internæ, ſi reſolutæ penitus non ſunt, irritamento, quod vomitorium in iis excitat, nequeant reſiſtere ?

123 Eapropter detrimentoſum iſthoc in apoplexia pharmacum exulabit : Aut illud ( ſiquidem adhibendum olim arbitremur ) iis tantum reſervabimus, qui phlegmatica temperatura ſunt, aut apoplexia a crapula, intemperantiave orta perſtringuntur, ut prudentiſſime poſt Baglivium (80) admonet humani corporis cum ſani tum morboſi ſcientiſſimus Heiſterus. (81)

124 Cui tamen haud conceſſerim emeticum, quo utemur, debere eſſe valens : Contra enim præferendum cenſerem illud, quod minus habet efficacitatis. Quod tamen, propter tanti viri auctoritatem, dixerim ſolum dubitanter.

125 Dum iſthæc ſiunt, excitandæ languentes vires ſunt, ſpiritibus mobilitatem circuitumque impartiendo. Linguam itaque, palatum, & nares vividis illis remediis, quæ cum univerſa medicorum noſtri temporis familia *volatilium* nomine placet designare, confricabimus.

126 Quo

(80) Prax. med. lib. I. de apoplex.

(81) Comp. med. præſt. cap. XLV. num. 33.

126 Quoniam vero plethoricis, biliosis, melancholicis, spasticæ demum apoplexiæ officeret id, quod fibras jam corrugatas convellendo cerebrum ferciret magis : Ideo inter volatilia seligantur temperatissima. Nos oleum, fumumve succini, vel ejusdem sal volatile ad aliquot grana optimo eventu adhibemus.

127 Phlegmaticis contra, inertibusque expediunt acutiora, cum interius, tum exterius. Qualia sunt, præter succinum, spiritus tartari compositus, liquor cornu cervini simplicis vel succinati, sal volatile viperarum, cranii humani, fuliginis, sal volatile oleosum Sylvii, castoreum, guttæ anglicæ, confectiones alkermes, de hyacintho incompleta : E quibus seligito, quod lubet, & quæ propinanda censes, aquis melissæ, menthæ, cinnamomi, salviæ, bethonicæ, immisceto, e cochleari identidem sorbenda.

128 Quæ valide ad sternutamenta invitant, removeto prorsus. Efficerent enim id, quod a vomitoriis, volatilibusque potentioribus metuendum esse præmonuimus.

129 His administratis remediis, si medicus adverterit colorem faciei nativo propiorem fieri, caloremque blandum per totum corpus percurrere : Si respiratio præsertim, pulsusque ad æqualitatem redeant, liberioresque percipiantur ; Si his post triduum aut quatrimum sudor tepens corpora tota perfundens, vel urina copiosa, crassaque, vel hæmorrhoides sponte fluentes advenerint, bono animo esse decet. Navis enim vel in portu est, vel haud procul.

130 Ait Hippocrates. (82) *Quibus bene valentibus capitis dolores de repente contingunt, statimque voce deficiunt, & stertunt, intra dies septem pereunt, nisi febris eos prehenderit.*

Item.

(82) Sect. 6. aph. 51.

Item. (83) *In sideratis si febris accedat, solutio contingit.*

131 Hoc explicatione opus habet ; nam ut immortalis memoriæ vir Ludovicus Duretus pronunciat, (84) sententia non est vera perpetuo.

132 Dicendum itaque, cum ephemeram, quæ vel sanguineo, biliofove sub morbi initium, tum acutam, quæ phlegmatico, quandocumque tamen in utrisque humor adhuc vasis continetur, supervenerit, posse apoplexiam solvere : At si humor extra cerebri vasa eruperit, ægrumque diutius morbus fregerit, febris funestum morbi exitum portendere. Quod ab Hippocrate ipso est adnotatum his verbis (85) *Syderationes, quæ repente fiunt, si insuper febris exsolutionis in modum contingat, quæ diutius trahat, perniciem minantur.*

133 Ægris, si interea ad se redierint, porrigantur juscula dilutissima, quibus salvia incocta sit : Tum emulsiones seminum peoniæ masculæ addito nitro simplici, vel antimoniatō. Item infusa ad theæ formam e foliis betonicæ, salviæ, pentaphilli, e floribus primulæ veris, tiliæ, liliorum convallium, pulveres item succini flavi, vel ejusdem sal volatile, camphora, castoreum, antimonium diaphoreticum, decoctiones quoque ligni visci quercini, radices peoniæ masculæ, valerianæ sylvestris, una cum herbis vel floribus, quos recensuimus. Et hæc quidem in universum : Nam diluunt, roborant, dispellunt.

134 Biliosis, spasticaque laborantibus præsidio erunt omnia, quæ humificant, diluuntque, serum præsertim lactis.

135 Nec ipsis refugienda est gelida ad plures dies ubertim

(83) Coac. præn. sect. II. n. 479.

84) In comment. ad hunc loc.

85) Coac. præn. sect. II. n. 480.

tim epota, (86) cujus beneficio cum sanatos complures Neapolis, dum celebrata illa Nosocomia frequentarem, tum in hac avita imperii sede, quam Divum genus MARIA THERESIA AUGUSTA, omnibus ingenii ad regimen dotibus ornata, numine suo splendidiorē facit, hominem jam deploratum instanti fato subductum vidi.

136 Aqua enim pondere, fluxilitate, particulisque nitrosis, frigorificisque, quibus imbuta est, vasa dilatare, humores intimius pervadere, solidasque partes extimulare vallet: unde nil mirum, si id, quod intra vasa adhuc residet, illius ope dissolvatur.

137 Infirma corpora, si tamen morbo supersunt (quod raro accidit) reficito vividis cum cibus, potionibusque, tum medicamentis.

138 Si vero nondum excitetur æger, sinapismata e pulvere sinapis, ruthæ, nasturtii, allii, sapone veneto, ac fermento panis acerrimo plantis pedum; nuchæ vero, brachiis, femoribus vesicatoria ampla illinire conducit. Frictionibus etiam dolorificis, cucurbitulisque bene incensis corpora tota assidue distrahere, & hac illac manibus concutere, quin & capite erecto immotoque circumgestare succussando (87) confert haud parum.

139 Juvat interea hic loci providere, ne ea, quæ de frictionibus cantharidibusque diximus, fraudi cuiquam sint. Etenim profunt quidem utraque phlegmaticis, serosæque apoplexiæ, in quibus humores cruote destituti vappescunt, fibrasque enervant; Unde stimulo indigent, ut motu tentantur.

H

140 At,

(86) Les vertus medic. de l'eau commune. vol. 2. in 12mo.

(87) Heist. compend. med. pract. loc. cit.

140 At contra in biliosis, & spastica, usus cantharidum, suspicione haud caret. Horum quippe fibræ tentæ plerumque ultra modum sunt, præcipue cum apoplexia epilepsiam, convulsionesque sequitur; Periculum itaque est, ne eam muscæ hæ augeant, vel renovent. Idcirco aut ab iis temperandum, aut parce adhibendæ, idque postquam corpora dejectionibus iteratis depleverimus.

141 Superest nunc, ut de præsidiis, quæ medicina manu curans nobis offert, verba faciamus. Ea sunt *terebratio*, quam trepanationem vulgus vocat: Et ferri candentis admotio.

142 Terebræ ergo, modioloque tunc locus erit, cum ictus, contusio, lapsus, quæ apoplexiam genuere I. Calvariam vel deprefferint, ut os, quod duram meningem urget, elevetur: vel fiderint, fregerintque, ut sanguis intus forte fusus, qui, propterea quod fissura angusta, vel tantum intima est, hæret, educatur, ne putrescat.

II. Calvaria licet inoffensa vasa interiora diffregerint, ut humor eruptus percolet.

143 Depressam calvariam tactu inierdum deprehendimus. Fissuræ signa incerta sunt, multoque incertior locus, qui læsus est. Eruptionem internam conjectura prosequimur.

144 Quæ observanda, ut operatio isthæc rite fiat, non est hujus loci memorare: potissimum cum præclarissima artis chirurgicæ, Germaniæque nostra lumina, quorum operibus propter soliditatem, ordinem, elegantiamque valde delector, Heisterus (88) & Joannes Zacharias Platnerus (89)

de

(88) Heist. inst. chirurg. Part. II. sect. II. cap. 41. n. 2.

(89) Platner. instit. chir. §. 552.



de ea scripserint tam docte copioseque , ut magnas illis gratias Posteritas omnis sit habitura.

145 Quibus viris Medici, qui Hippocratem imitantes, & chirurgiam, Medicinæ individuo vinculo conjunctam, colimus, id quoque debemus, ut artem hanc nobilissimam, & primam quam medentes exercuerunt, valeamus a ludibrio vulgi, qui eam cum balneatoria turpiter confundit, liberare. (\*)

146 Liceat vero & mihi hic gratulari, tum quod cum prudentissimis istis Professoribus semper crediderim terebractionem, utpote ancipitem, periculosamque, tractandam & quidem circumspectissime, tunc tantum cum alia via, qua opitulemur ægris non suppetat; (90) Tum si nulla vitæ spes superfuit, in usu & mihi fuisse repetita, etsi fortuita, modiolii applicatione caput perforare.

147 Ferrum candens, cujus efficaciam extollunt quidam (cauterium actuale vocant) cum adhuc juvenia servens tentarem ardua, consuevi coronariæ futuræ admovere: At quoniam spe mea pluries frustratus sum, nescio quid de illo statuam.

148 Aduersionem quam Mistichellius (91) proponit, expertus sum nunquam. At Heistero (92) non respondit.

149 E serratimentis candentibus prope jacentis pedes locatis, id unum consequutus sum, ut pedes retraherentur parum, nullo tamen ægri beneficio.

H 2 150 Sar-

(\*) Heister differt. de chirurgia cum medicîna necessario conjungenda, & Platnerus præf. Instit. & in opuscul.

(90) Loc. cit.

(91) Della apoplessia.

(92) Inst. chir. p. II. sect. I. cap. 22.

150 Sartagine caput ustulasse, quod antiquis commendatum, quid prosit, ignoro, cum ea nunquam usus sim. Vereor autem, ne quid portet mali.

151 Hæc cum dubia sint, non ausim nec suadere, nec improbare. Si id lubet, periculum facito : at non sine ratione, ne tibi aliisque defis.

152 Si post hæc ronchi fortiores fiant, spumaque in ore appareat, pereundum certe ægro est. Nam id, quod Galenus (93) refert, vixisse quosdam, quibus spuma fluxerat, censeferi potest, si minus incredibile, saltem rarissimum.

153 Illud vero, quod cum ab ipso alio in loco, (94) tum a Celso (95) narratur evenisse quibusdam, ut postquam dies integros sine ulla respirationis nota exteriori transegerint, tandem revixerint, verissimum esse testantur plures pervulgatæ historiæ, quas quoniam doctissimus Bruhierius (96) cum de genere humano, aureolo libello : tum speciatim de patria sua, Hoffmannianorum operum versione optime meritis, collegit, prætereo. Solum addam narratum mihi a viro fide digno fuisse, nobilem Florentinam matronam Nerliam adhuc virginem, dum in eleganti Falconeriorum Tusculano rusticaretur, uteri spasmo fuisse adeo perstrictam, ut triduo mortua, etiam a medicis, putaretur, quæ tamen ita revocata est, ut Rasponio nobili Ravennati nupserit, & ad extremam senectam pervenerit. Vidique egomet Tridenti hominem toti urbi notissimum, cui in aperto cæmeterio ob paupertatem sepulto, post duodecim horas rediit spiritus, vixitque adhuc annos ultra viginti alacer, & ad laboriosiora quæque servitia paratissimus.

145 Nec

(93) In commentar.

(94) titio de locis affect. cap. 7.

(95) Lib. 2. cap. 6.

(96) Dissert. sur l'incertit. des signes de la mort. Paris. vol. 2. in 8vo.

154 Nec pluma ante nares, osque suspensa, nec aquæ vasculum pectori impositum, hisque similia, quibus ad explorandum, utrum respiret mortalis, uti nos vult eximius ille morborum pictor Jodocus Lommius (97) sunt ita certa, ut ægrum, ni hæc respondeant, interiisse affirmemus. Fieri enim potest, ut iis decipiamur.

155 Ignotum quippe non est posse cor, quod ad vitam sufficit, moveri ita, ut nullum suæ motionis indicium præbeat sensibus, vel acutissimis. Quod qua ratione fiat, haud novimus: nisi forte verisimile putemus feriari tunc a motu intercostales musculos, & diaphragma, pulmones vero tantum expandi, quantum satis sit motui cordis, & sanguinis conservando. Hoc tamen conjectandi causa protuli: Haud enim me latet, putare quosdam posse cor prorsus a motu cessare, iterumque moveri, si quæ adhuc illi remanent ad se movendum vires, quandocumque a qualibet causa rursus excitentur.

156 Hinc sapientissime Prosper Martianus, alii que veritant, ne corpora eorum, qui repentino aliquo casu perierunt, sepulturæ tradantur, antequam putrescere ceperint: Putredinem enim solam certissimum, imo unicum mortis indicium esse autmant. De quo argumento, propterea quod summo doctrinæ, eruditionisque apparatu egerunt Bruhierius (98) & Louisius (\*) verbum non amplius eloquar.

157 Hanc autem rem commemorare necessarium duxi, quoniam alicubi homines ingenio tam levi sunt, ut nec biduo ferre queant aspectum ejus, a quo divelli nullo pacto posse paulo ante videbantur.

H 3

158 Quæ

(97) Med. obs. lib. 2. de morb. atton.

(98) Loc. cit.

(\*) Lettres sur la certitude. des signes de la mort. par Mr. Louis. Paris chez Lambert. 1752. in 12mo.

158 Quæ huc usque protulimus, pertinent ad accessiorem, statumque morbi.

159 Antequam vero remissionem dispiciamus, postulat a nobis muliebris sexus, ut illarum saluti consulamus. Cum enim eæ propter uteri contumaciam peculiari observatione indigeant, deessemus officio nostro, generique humano, cui ex iis jucunditas omnis promanat, injuriam inferremus, si negligere proferre id, quod earum levamento experti sumus conduxisse.

160 Fœminis igitur, quas uterus vel reddidit apoplecticas, vel male afficere solet, perspecta in antecessum cujusque temperatura, ita consulto.

161 In universum, quæ irritant, convelluntque, amoveto prorsus: membranarum siquidem cerebri, nervorumque motum stimulo suo foverent; unde convulsiones, quæ apoplexiam pepererunt, parere possunt, invalescerent. Hinc clysteria irritantia, sinapi, cantharides tractare nefas esto.

162 Sanguineis itaque, biliosisque post detractum, quoad expedit, sanguinem, clysteria emollientia, castoreo immixto, deinde volatilia illa temperata, quæ superius laudavimus, opportuna usui sunt.

163 Præ ceteris vero apta hujuscemodi temperamento esto camphora cum succino in aqua peoniæ, ceraforum nigrorum alterave simili liquata: ut eorum imprudentiam vitemus, qui propinatis indiscriminatim aquis hystericis e gummibus, myrrha, salisque ammoniaci spiritu biliosas fœminas vel horrendum in modum cruciarunt, vel atra nocte perfuderunt, quod doleantes recolimus.

164 Non dubito fore medicos quosdam, qui me cachinnis excipient, quod camphoram tanquam pharmacum refrigerans commendem. Ex eo enim, quod illa ad ignem flagret, conjiciunt eam esse haud mediocriter calfacientem. At quid reponam istis? Nil certe.

165 Suaferim eos tantum, ut Baglivium, (99) Trillerumque (100) ignota sibi nomina perlegant, qui camphoram in pleuritide, qua non pleuram tantum, sed & pulmones affici incendio constat, præscribunt; Quod Romanorum Nosocomiorum usu confirmatur, ubi binis, ternis, quin & pluribus granis sanatos ægros plurimos, vidi egomet.

166 Præscire tamen eos decet, Baglivium apud omnes gentes haberi praxeos medicæ intelligentissimum, Trillerum vero eum esse, a quo artis nostræ parentem Hippocratem incorruptum, latinoque sermone sensa sua genuina tandem exprimentem universi, qui veram medicinam, bonasque literas amant, expectant.

Phlegmaticas stimulo vividioribus; at ne noceas, caveto.

## SECTIO IV.

167 **R**Edeamus ad ægrum.

Si remissioni locus fuerit, exploremus, quali corporis habitu sit is, qui laboravit. Num quo corporis, mentisve incommodo percellatur. Quibusdam enim dimidium os, orique proximæ partes; nonnullis alterutrum corporis latus, vel pes, brachium, linguaque tantum resoluta sunt. Plerisque mens vel stupet, vel prorsus fatua est, sopor quosdam

(99) Prax. med. lib. I.

(100) De pleuritide.

dam occupat, & recurrens vertigo. E noxa enim, quam quisque passus est, repetemus cum morbi prægressi vim, tum inde sequutura.

168 Omnino itaque studeamus, ut turbatum corporis motum restituamus, tum ut, quod morbidæ causæ superest, expellamus, denique periculum, quod ut plurimum misellis impendet, arceamus. Plures enim maxime senes ad se redeunt, qui tamen persæpe septem post dies pereunt: Quo pacto optimus parens meus decessit. Quidam circa æquinoctia, æstatemque, nonnulli post annum, alii post longius temporis spatium denuo percelluntur. Quod fatum, cum pendeat ex interiori solidorum morbo illata læsione, pervidere medico nisi obscure concessum non est.

169 Ut primum igitur apoplexia recessit, reficiamus ægrum jusculis ex avibus, in quibus hyssopus, serpillum, intubus, salvia incocta sint. Potui sit hydromel vel oxymel ab antiquis commendatum.

170 Tum materiem, quæ in ventriculo, intestinisque conclusa latitat subducamus, vel vomitorio unice ex ipecacuanha, si id expedire ægri status monet, vel fortasse melius purgativis lenibus, rhubarbari nempe drachma una, nitri, pulverisque antispastici drachma semis, prunis laxativis, magnesia nitri, similibusque haud acriter stimulantibus, quibus septimo quoque die utendum. Notum scilicet cuique est ad impediendos capitis morbos eximie prodesse dejectiones.

171 In quo tamen cavendum, ne phlegmaticis manna, biliosis aloes exhibeatur. Laudabantur olim pulvis cornachinus, qui non despiciendus: dummodo in eo diagridii modus augeatur, aut pilulæ de succino Cratonis.

172 Quæ

172 Quæ acredinem intestinis hærentem retundunt, & laxata alvo præscribuntur a quibusdam, sunt oculi cancerorum, conchæ præparatæ, pulvis marchionis, nitrum, succinum præparatum, cinnabaris, tartarum vitriolatum, arcanum duplicatum, cum tantillo castorei in aqua florum chamomillæ, melissæ, menthæ, ad dies octo vel decem sumenda.

173 Hæc haud improbaverim, dummodo cancris, margaritis, pretiosisque hujuscemodi nominibus mirificam nescio quam facultatem, ut vulgo fit, haud tribuamus. Quod frustra a me dictum noli.

174 Video enim: ut hoc obiter advertam, magnificari isthacce merces, præcipue in febribus, ac si ad eas debellandas valerent plurimum, quoniam caro veneunt.

175 Ego scilicet assentior Rotundio ita agenti: (101)  
*In iis autem, quæ adeo pervulgata, & pene quotidiana sunt, cancrinis testis, crysallo, margaritis, aliisque, quorum nuper meminimus, morosus, frigidiorque aliquanto sum; nam de eorum utilitate, utique in febre, nihil adhuc certi statuit experientia: ratio contraria suadet. Hincque est, quod suspicer, ceteros medicos isthac invexisse in febris curationem, non tam ut utilia afferrent, quam ut nocentiora exturbarent; Etsi non ignoro, quod esse interdum locus & iis potest, & esse, ubi utilia evidentissime deprehenduntur. Quod nec latuit antiquos, quorum improbo labori, sagæque industria, nihil aut parum est, quod non posteri debeamus.*

176 Stomachum & caput roborant, melissa, salvia, mentha, corticum aurantiorum essentia, ut vocant, spiritus nitri dulcis aquæ infusus, elixir stomachicum temperatum. Horum usus diuturnus sit, nam stomachum brevi temporis spatium roborare, non est ut speres.

I.

177 San-

(101) de vict. rat. in febr. acut. part. III. p. 136.

177 Sanguineis, biliosis, melancholicis exhibito, quæ diluunt: nempe serum lactis, emulsiones, nitrata. Placent quibusdam pulvis de Gutteta Riverii, vel succinum flavum præparatum, in decocto ligni viici quercini, foliorum betonicæ, florumque primulæ veris ante novilunium, plenilunium, quin & singulis lunaris conversionis quadrantibus hauriendum. Selteranæ, item ac Spadanæ aquæ.

178 Phlegmaticorum torpentem spiritum excitato potio-  
nibus aquæ è melissa, peoniaque, sale volatili succini, liquore cornu cervini imbutæ: iusculis quoque salviæ, betonicæ, primulæque veris incoctione infectis.

179 Volatilibus omnibus, quæ in hisce temperamentis conducunt, præpono ego sal volatile viperarum. Etenim maxima illud pollere efficacia expertus sum pluries, ac præsertim in homine, quem vires è tertiana duplici jam debellata prostratas ausum mero recuperare, catalepsis spuria perstrinxit. Salis enim istius virtute tridui spatio convaluit.

180 Nec despicienda, ut quidam superciliose faciunt, è viperis ipsis confecta decocta. Experimentis enim pluribus cum doctorum hominum, tum meis comprobata sunt.

181 Conferunt iisdem & ea, quæ sudorem eliciunt, decoctum nempe sasafRAS, radice valerianæ sylvestris, salsæparillæ, ligni guajaci, juniperive. Aquæ item carolinæ, spadanae, ægranæ, viscerum obstructionibus, si quæ sint, ante discussis.

182 Tum ad fibras firmandas, digestionem promovendam, cruditates avertendas, chalybem ingerito, sive sit mars ipse, sive tinctura martis cum succo pomorum, aut tartarizata Zwölferi, aut crocus martis aperitivus, aut tandem peruanus cortex, cujus usum, præsertim in gangræna, præstans

Bono-



**Bononiensis Instituti Sodalis Molinellius summopere illustravit. (102)**

183 Invaluit abusus, ut quoniam thermæ sulphureæ quosdam juverant, ad eas inconsulto quicumque amandentur. Rem certe mortalium plurimis exitialem. Eæ siquidem, quantum phlegmaticis infirmisque fibris profunt, tantum sanguineis biliosisque obsunt.

184 Bis enim, ut domestica proferam, Badenses aquæ, dum illis valetudinis causa me abluerem, pollutæ sunt decessu repentino eorum, qui aquis innocue perlui ad arbitrium se posse sibi infausto persuaserant. Thermas itaque, nisi inspecta diligenter cujusque natura, ne consulto.

185 Veteres medici ad paralyfin, quæ plerumque apoplexiam revocat, commendant, stillicidia, frictions, exasperationes cutis, adustiones, sanguinis ex sideratis membris missiones, aliaque apta motum parti resolutæ conciliare.

186 Nobis tamen sperandum est plurimum boni allatura experimenta ea, quæ de restituendis electricitate resolutis corporis humani partibus a viris doctis Pivato Venetiis, & Verato Bononiæ vetusto scientiarum domicilio, cui nupera Laudatissimi Bruckeri laudatione (103) haud mediocre decus accessit, tentata, perficiuntur apud nos a percelebri Josepho Frantzio è Societate Jesu bonis litteris excolendis promovendisque nata, qui Cabæos, Kircheros, Lanas, Fabros suos clarissima exploratoricæ Physices lumina secutus, nihil ex iis, quæ ad corporum scientiam experimentis ampliandam conferunt, intactum relinquit: ut quod ipse labore improbo detexit, in bonum auditorum, qui frequentes ad eum confluunt, urbisque nostræ ornamentum cedat.

I 2

186 Haud

(102) Comm. Inst. Bonon.

(103) Epist. dedic. Institut. hist. Philos. Lipsiæ. 1744. 8.

186 Haud prætermiserim hic adnotare virum maximum Valsalvam, cujus memoriam recolam quoad vixerim: propterea quod ab eo in anatomicis rebus, ante hos triginta quatuor annos, Bononiæ institutus sum, observasse (104) illos affectus apoplecticos, in quibus altera medietas corporis resoluta est, pendere a læsione alterius medietatis cerebri: hæc tamen ratione, ut si medietas corporis resoluta sit, adsit læsio in dextro cerebri hemisphærio: Si vero dextra, in sinistro: Quas observationes, ad curandum summopere proficuas, perdoctæ, ut solet, Morgagnus noster in Præceptorem pientissimus illustravit. (105)

187 Maximum ad prævertendam apoplexiam præsidium situm est in opportunis sanguinis detractionibus, in sanguineis scalpello, & in iis, quibus hæmorrhoides fluere ante solebant, hirudinibus.

188 De hisce supervacaneum est hic loci verba facere, cum servanda examussum sint ea, quæ superius monuimus.

189 Id vero pernecessarium est meminisse. Observatur nempe constanti medicorum experimento; mittendum esse sanguinem antequam sol dies æquet noctibus.

190 Nonnulli, qui sententias sibi ignotas, aut non intellectas subsannando, philosophi haberi volunt, ringent, dum audient mentionem a me fieri de sole lunaque: ac si ipsi saperent, cæteri cæcutirent.

191 Scimus & nos, non ea potestate prædita esse sidera ista, qualem illis tribuerunt veteres.

192 At num ideo, quia illi quandoque somniant, libebit doctis viris omnia referre inter aniles fabulas, postquam

(104) Tract. de aure, cap. V. n. 8.

(105) Epist. anat. ad scripta Valsalvæ.

quam Meadius, (106) quæ de solis lunæque in humana corpora Imperio vera sunt; quæ probabilia, quæ denique falsa, tam docte differuit?

193 Quæ ad reversuram apoplexiam præpediendam ex arte consulimus, irrita putato, ni scrupulosam vivendi rationem religiose sectentur ægri. Omnia enim, quæ proposuimus, eo tendunt, ut humores comescant, ne ii ferocientes cerebrum iterum proculcent. Eapropter si quid vel minimum in vita peccetur, latentes morbi scintillæ erumpent illico in incendium, unde æger absumatur. Temperantia enim adeo pollet, ut per eam mors ab aneurismatibus, varicibusque internis impendens evitetur, ægrique post annos plures lento morbo tandem conficiantur. (107)

194 Si luce itaque diutius frui volumus, volumus autem omnes, abstineamus sedulo ab iis, quæ eam nobis eripiunt.

195 Mensa levibus, costuque facilibus cibis instructa reficiat tantum: Quæ nimium nutrit; nocentissima quippe est. Pullos, oviculas, hædos cariophyllis, cinnamomo, majorana, salvia, rore marino, nuce muscata ad stomachum leviter conditos, edito. Succosa, acida, salita, viscosa, incocta, dulcia, pingua, calfacientia, olera, fructus vetita sunt.

196 Phlegmaticorum, debiliorumque sitim modico vini austeri, Rhenani nempe Burgundive, aqua felterana multa demerso: Sanguineorum, biliosorumque aqua restinguito: Vel, eam si minus ferant, corticibus aurantiorum roborato.

197 Corpus ambulationibus, frictionibus, succussionibus,  
I 3 mode-

(106) de imperio solis & lunæ.

(107) Larcif. libr. cit. cap. XXIII. n. 7. 8.

moderatis tamen, ne nimium vel fatigetur vel æstuet, exerceto. Currum apertum frequenter conscendito.

198 Aërem purum, campestre, diu quærito. Palustrem, ventosum, varium, humidum, corruptum sordibus, uligine, exhalationibus vitato.

199 Membra neque vigiliis dissipato, neque somno hebetato.

200 Diei noctisque munia distribuito: Statuta quæ sunt, ne violato. Legibus enim obligari, quod sanis hominibus, qui bene valent, esset inutile, infirmis est prorsus necessarium.

201 Præ ceteris ab ira, metu, tristitia, voluptatibus temperato: Quæ ut ratione utentibus indecora, ita mortaliū valetudini insensissima.

## SECTIO V.

202 **E**xposuimus summam, quid facto opus sit, ut apoplexiæ obsessis succurramus, cum in ipso morbi accessu, tum in ejus recessione. Dicendum modo aliquid videretur de gravissimo isthoc morbo arcendo ab eo corpore, quod hactenus intentatum quidem est; at tentari posse suspicamur: Cum nostrarum partium sit non morbum tantum, sed & id, quod morbum efferre valet, eradicare.

203 Quoniam vero eadem arma exferere necessum est, cum periculum primo ingruit, ac eum ejus reversio timeatur, iniqui essemus lectoribus, si putaremus eos ingenio tam bardo esse ut in rem suam, quæ in medium attulimus, transferre non valeant.

204 Nobis certe ea, quæ semel diximus, repetere, nisi id perspicuitas postulet, cum supervacaneum, tum molestum, quin & risu dignum existimamus.

205 Pauca ergo subjungemus, quæ ad judicationem instantis apoplexiæ pertinent.

206 Apoplexia ex nativo, adnatove partium solidarum vitio nec pervideri, si dolor capitis absit, nec præverti potest.

207 Illi, quam vulnus, concussio, compressio exterior, convulsiones, fluidarumque partium vitia effectura sunt, manum admoveto: Nam medicinam non resquit.

208 Sanguineos, biliosos, juvenes, loca sana incolentes, facili opera sanos reddes.

209 Phlegmaticis contra, melancholicis, ægritudinibus, morboque affectis, senibus, hystericis, noxia loca habitantibus, nihil proderit ars, nisi patiens laboris ac molestiarum animus accesserit. Meminerimus tamen Lancisii (108) monitum prudentissimum: Cum ne timidos ægros de periculo aperte admoneamus: Tum ne strenuos periculorumque contemtores remissius alloquamur. Alteros enim mærore, alteros præfidentia jugulabimus.

210 Venimus tandem ad extremum disputationis nostræ. Antequam vero legentes dimittamus, vituperatoribus simplicium medicamentorum respondebimus paucis.

211 Ipsi enim, propterea quod immensis dispensatoriorum, Receptoriorum, Pharmacopæarum voluminibus hallucinati putant in prolixis Pharmacorum descriptionibus valdiflima vitæ præsidia, certissimaque morborum omnium antidota

dota contineri, temnunt medicinam, vulgaribus tantum, simplicioribusque remediis confidentem.

212 Nec putant, posse quem haberi artificem, nisi is sit, qui arcessitis ex universo orbe, chymicorumque fornacibus, & in unam massam confatis radicibus, pulveribus, foliis, metallis, geminis, animalibus formulas scriptet longas, sumtuosasque.

212 Infelices ergo gentes vetustissimæ, deploranda cum Egyptiis artis conditoribus universa Asclepiadarum familia, qui herbis, quas in nativo solo severat natura, vitam protrahi, morbosque depelli posse existimastis, eo quod splendida nostrorum temporum sapientia caruistis!

214 *Quantum est in rebus inane!* Quæ posita ante omnium pedes in utilitatem nostram a providentissimo Deo sunt, præterimus fastidiose, etsi experimento multiplici probata.

214 Malumus vero calfacientes refrigerantibus, acris, amaraque dulcibus, peregrina ignota miscere; non quidem ut mortalibus opem seramus, sed ne parum multa scisse videamur.

215 *Artem experientia fecit exemplo monstrante viam.* (\*) Remediorum simplicium potestatem, quam ad communem usum detexit casus, cognosceremus magis, nisi stolidæ cujusque rei vim temeraria commixtione infringere.

216 At Celsum afferunt dicentem (109) *differe pro natura locorum genera medicina. Et aliud opus esse Romæ, aliud in Egypto, aliud in Gallia.*

217 Be-

(\*) Manil. astronom. lib. 1. v. 61.  
(109) Præf. lib. I.

217 Bene est : Ecquis negaverit infirmiora, quæ sunt corpora medicinam, robustioribus conducibilem, respuere? Nec ignorant vel tirones pro varietate coeli, terrarum, alimenterum variari cujusque temperaturam : ut Hispanum jugulet calfaciens, quod Germanus assumit utiliter.

218 At quid hoc ad simplicia? num desunt inter hæc, quæ cujusque naturæ accomodemus?

219 Inutilem & instituto meo alienam operam suscipi-rem, si singula enumerarem. Norunt ea, ut de nostris lo-  
quar, Hallerus, Hebenstreitius, Heisterus, Erhardtus, Gesnerus Botanices expertissimi, & cum iis omnes, qui non ex circulatorum penu, sed ex ipsa rerum natura sapiunt.

220 At inquiunt Germanorum nostrorum torosa corpo-ra dimetienda non sunt exsuccis Italorum artubus. Compo-sitis itaque medicamentis ea ni stimulaveris, nil efficies.

221 Ego sane reprehendere non audeo compositiones, quas consummati in arte professores perspecta cujusque re-medii natura excogitarunt vel laudarunt. Quin illis, si quan-do occasio ferat, utor audacter, cum nihil aliud quæram, ac ægrorum salutem. Nec enim malevolus sum, nec supra ceteros me arroganter effero. At isthæc pauciora opinione nostra sunt : nec omnibus respondet semper effectus.

222 Contra vero non tantum in Italia, cui medicinæ scientiam debeo, sed novem integris annis apud Rhætos, totidem Græcii, ubi publico quoque ære artem feci, deni-que ultra decennium hic loci, quo ex universa Germania mortalium plurimi confluunt, usum me simplicibus frustra fuisse non recorder. Ita ut si quid boni hisce triginta annis, quibus aliorum valetudini tuendæ operam meam locavi, præ-stiterim reipublicæ, unice illis acceptum feram.

K

223 At-

223 Atqui si experientia mea nihil habitura sit ponderis, ablego eos, qui aliter sentiunt ad elegantissimam Hoffmanni nostri exercitationem *De remedium domesticorum praesentia* : ut inde discant vitæ fortunisque civium tandem parcere.

224 Quod si nolint ab instituto suo recedere ( & profecto impressas memoriæ formulas sine hæsitatione conscribibile ducit compendiaro ad celebritatem ) *desinant saltem maledicere, malefacta ne noscant sua.*

225 Labet autem hic loci, ut peccandi occasionem omnem summoveamus, gravissima Celsi (110) verba describere: Quibus præcepta de medicaminum qualitate, usuque comprehenduntur: *Illud ignorari non oportet, quod non omnibus ægris eadem auxilia conveniunt. Ex quo incidit, ut alia atque alia summi auctores, quasi sola venditaverint, prout cuique cesserant. Oportet itaque, ubi aliquid non respondet, non tanti putare auctorem, quanti ægrum, & experiri aliud atque aliud. Sic tamen, ut in acutis morbis cito mutetur, quod nihil prodest: in longis, quos tempus, ut facit, sic etiam solvit, non statim condemnatur, siquid non statim profuit: minus vero removeatur, si quid paulum saltem juvat; quia profectus tempore expletur. Felices ægri, si medentium animis talia infederint!*

226 Apoplexia ergo, ut in pauca disputationem nostram contrahamus, morbus est atrox, quo subitario vel perit homo, vel pulsu ac respiratione vigentibus motu, sensuque privatur, propterea quod spirituum secretio, distributioque cum a solidarum tum a fluidarum partium vitiis intercipitur.

227 Quam concessum est præcavere, & curare, si minus ut volumus, saltem ita, ut interitu in aliud tempus artis ope dilato boni cives habeamur, & simus, & medicinam ab indoctorum calumniis vindicemus.

228 In



228 In ea cum describenda, tum curanda auctores habui primores ab Hippocrate ad nostram ætatem medicos. Si quid valui in eorum sententiis rite deligendis, disponendisque, non ingenio, quod in me est exiguum, sed constanti exercitationi tributum volo.

229 Si quid vero minus veritati consentaneum mihi præter voluntatem exciderit, quod homini nihil humani a se alienum putanti est facillimum, profiteor me Halleri candorem imitaturum, qui in egregio libello, (III) quem modesto primarum linearum physiologiæ titulo insignivit, non dubitavit conceptis verbis a Præceptoris sui dogmatibus, quæ voce, scriptoque viginti annis docuerat, recedere: Dummodo recte, & ut litterarum cultores decet, urbane admoneamur.

230 Haud enim tantum otii nobis superest, ut bonas horas perdere nugando velimus. Ad convicia vero descendere indignum prorsus medicorum moribus, quos Hippocrates vult graves, compositosque esse, existimamus.

(III) Præf.

F I N I S.



